

Ri Utzilaj Tzij re Jesucristo tz'ib'ital kan ruma ri Marcos

*Katzijon ri Juan Aj Ya'l Bautismo
(Mt. 3:1-12; Lc. 3:1-9, 15-17; Jn. 1:19-28)*

¹ Wa' e jeqeb'al re ri Utzilaj Tzij re ri Qanima-jawal Jesucristo, Ruk'ajol ri Dios. ² E xu'ana pacha' ri tz'ib'ital kan ruma ri q'alajisanel Isaías puwi ri ub'i'im lo ri Dios:
Ri'in kannab'esaj b'i chawach ri'at, ri waj chak aj tzijol we'in,

cha' kuyjb'a' ri b'e chwach pan rawoponib'al.

Mal. 3:1

³ Katataj uql jun tzijonel kasik'in chupa ri luwar katz'intz'otik, jewa' kub'i'ij:

“Yijb'a' pana alaq ri b'e re ri Qanimajawal;

suk'upij alaq rub'e Rire” *Is. 40:3*

xcha'.

⁴ Ri Juan katajin che uya'ik ri bautismo pa jun luwar katz'intz'otik. E kub'i'ij chike ri winaq kak-itzelej kitzij chwach ri Dios, kakik'ul ri bautismo, y jek'ula' kakuytaj ri kimak. ⁵ Ewi konoje ri tikawex e k'o pa taq ri luwar re Judea y konoje ri e k'o Jerusalem, xeb'el lo che utayik ri Juan. Kakitz'onoj k'u kuyb'al kimak chwach ri Dios, yeys ri Juan kuya ri bautismo chike chupa ri nimaya' Jordán.

⁶ Ek'u ruq'u' ri Juan 'anom ruk' rismal camello, y rupas ximil che rupa e jun tz'u'um. Yey ri kutijo e ri sak' y uwa'al kab' re upa taq juyub'.

⁷ Jek'uwa' ri tzijonik ku'ano:

«K'o Jun katajin lo chwij más nim ruchuq'ab' chinuwa ri'in, ma na taqal tane chwe kinyuxi'ik re kankir ruwach ruxajab'. ⁸ Paqatzij wi, ri'in xinya ri bautismo che alaq ruk' ya'; no'j ri bautismo kuya Rire che alaq, e ruk' ri Santowilaj Ruxlab'ixel ri Dios» kacha'.

*Ri bautismo re ri Jesús
(Mt. 3:13-17; Lc. 3:21-22)*

⁹ Chupa taq k'u la' la q'ij, ri Jesús xel lo Nazaret, (wa' e jun tinamit re Galilea), y x'an k'u bautizar rumá ri Juan chupa ri nimaya' Jordán. ¹⁰ Na jampatana xel lo ri Jesús pa ri ya', xrilo echiri' xjaqataj ruwa kaj y ri Ruxlab'ixel ri Dios pacha' juna palomax xqaj lo puwi!. ¹¹ Y xch'aw lo Jun chila' chikaj, jewa' kub'l'ij:

«At ri'at Nuk'ajol y lik k'ax katinna'o.
Lik kinki'kot chawe»
xcha che.

*Ri k'amb'al upa ri Jesús
(Mt. 4:1-11; Lc. 4:1-13)*

¹² Tek'uchiri', ri Jesús xk'am b'i rumá ri Ruxlab'ixel ri Dios pa jun luwar katz'intz'otik. ¹³ Ri Jesús xk'oji' chila' cuarenta q'ij chikixo'l itzel taq awaj. Yey chupa taq la' la q'ij, lik xk'am upa rumá ri Satanás. Ik'owinaq chi k'u wa', ri ángeles xkijeq kakinimaj ri Jesús.

*Ri Jesús kujeq kak'utun chwi rutaqanik ri Dios
(Mt. 4:12-17; Lc. 4:14-15)*

¹⁴ Echiri' ya'om chi ri Juan pa cárcel, ri Jesús xe'ek Galilea che utzijoxik ri Utzilaj Tzij re rutaqanik ri Dios, ¹⁵ jewa' kub'l'ij:

«Xopon k'u ruq'ijol echiri' rutaqanik ri Dios xa naqaj chi k'o lo wi; tzelej k'u tzij alaq chwach ri Dios y kojo alaq ri Utzilaj Tzij» kacha'.

*Ri Jesús keb'usik'ij kajib' e aj chapal kar
(Mt. 4:18-22)*

¹⁶ Echiri' kab'in ri Jesús chuchi' ri mar re Galilea, xeril pan ri Simón ruk' ruchaq' Andrés, e ri' kakik'aq ri ki atarraya chupa ri ya', ma rike e aj chapal kar.

¹⁷ Ek'u ri Jesús xub'i'ij chike:
—Chixpetoq, chixterej lo chwij y ri'in kan'an chiwe ix aj molol tikawex* jela' pacha' i'anom lo chike ri kar —xcha'.

¹⁸ Rike xkiya kan ri ki atarraya y xeterej b'i chirij.

¹⁹ Xb'in k'u pan jub'iq' chik y xeril ri Jacobo ruk' ruchaq' Juan, ri keb' uk'ajol ri Zebedeo. Rike e k'o chupa jun barco y ketajin che uk'ojoxik ri ki atarraya. ²⁰ Ek'u ri Jesús xeb'usik'ij; rumá k'u ri', rike xkiya kan ri kiqaw Zebedeo kuk' ri kimokom chupa ri barco y xeterej b'i chirij.

*Ri Jesús kukunaj jun achi k'o puq'ab' jun itzelilaj uxlab'ixel
(Lc. 4:31-37)*

²¹ Xeb'ok k'u pa ri tinamit Capernaúm. Y chupa ri q'ij re uxlanib'al ri Jesús xok pa ri sinagoga y xujeq kak'utunik. ²² Y ri xetaw re lik xkam kanima' che, ma rumá ruk'utunik kaq'alajinik lik k'o uwach, na pacha' ta ri kaki'an raj k'utunel re ri tzijpixab'.

* **1:17** “Ix aj molol tikawex”: Ri chak xya' chike e kekitzukuj tikawex re keb'u'an utijo'n ri Jesús. Lc. 5:10

23 Chupa k'u ri sinagoga k'o jun achi k'o puq'ab' jun itzelilaj uxlab'ixel. Wa' xujeq kasik'inik, jewa' xub'i'ij:

24 —Lal Jesúś, aj Nazaret, ¿su'chak ko'lmina ib' la quk'? ¿E la' lal petinaq re ko'lsacha la qawach? Ri'in weta'am lal chinoq, lal ri Santo K'ajolaxel re ri Dios —xcha'.

25 Ek'u ri Jesúś xuq'atej ri itzel uxlab'ixel, jewa' xub'i'ij che:

—¡Match'a't chik! Chatelub'i che la'chi —xcha'.

26 Ri itzelilaj uxlab'ixel xuk'aq la'chi pulew y lik ko xujab'aja'; yey kasik'inik xel b'i che la'chi.

27 Konoje k'u ri tikawex lik xkam kanima' che y kakitz'onob'ej taq chikiwach:

«¿Sa' wa'? ¿Sa' chi k'ak' k'utunik wa'? Ma k'o ne puq'ab' kataqan pakiwi itzelilaj uxlab'ixel y wa' kakikoj utzij» kecha'. **28** Y na jampatana, pa taq ronoje ri luwar re Galilea xe'ek utzijoxik janipa taq ri ku'an ri Jesúś.

*Ri Jesúś kukunaj ruchu-iji' ri Pedro
(Mt. 8:14-15; Lc. 4:38-39)*

29 Echiri' ri Jesúś kuk' ri Jacobo y ri Juan xeb'el b'i chupa ri sinagoga, xeb'ek chirocho ri Simón y ri Andrés. **30** Ek'u ruchu-iji' ri Simón k'o chwa uwarab'al, k'o aq' chirij. Xkitzijoj k'u ri' wa' che ri Jesúś. **31** Ewi ri Jesúś xqib' ruk' la yewa', xuchap ruq'ab' y xuto'o cha' kayaktajik. Na jampatana k'u ri' xik'ow ri aq' chirij rixoq y xujeqo keb'unimaj.

*Ri Jesúś keb'ukunaj uk'iyal yewa'ib'
(Mt. 8:16-17; Lc. 4:40-41)*

32 Echiri' b'enaq chi ri q'ij e ri' kayub'ub' chik, xek'am lo chwach ri Jesúś konoje ri yewa'ib' y

ri e k'o pakiq'ab' itzel uxlab'ixel. ³³ Y konoje ri tikawex re ri tinamit xet'iqi' chuchi' ri puerta re ri ja. ³⁴ Ek'u ri Jesús xeb'ukunaj uk'iyal yewa'ib' che uk'iyal uwach taq yab'il y xeb'eresaj b'i uk'iyal itzel uxlab'ixel; pero na xuya ta luwar chike kech'awik ma rike keta'am china Rire.

*Ri Jesús kak'utun pa taq ri luwar re Galilea
(Lc. 4:42-44)*

³⁵ Lik anim tan echiri' lik k'a q'equ'm, xwa'lij b'i ri Jesús, xel k'u b'i chupa ri tinamit y xe'ek pa jun luwar katz'intz'otik cha' ku'ana orar. ³⁶ Ek'u ri Simón kuk' ri rachb'il xeb'ek che utzukuxik.

³⁷ Echiri' xkiriqo, xkib'i'ij che:

—Konoje ri winaq kakitzukuj la —xecha'.

³⁸ Ek'u Rire xub'i'ij chike:

—Jo' che utzijoxik ri Utzilaj Tzij pa taq ri luwar e k'o lo xa naqaj, ma e nuwach ri' in petinaq Ri'in —xcha chike.

³⁹ Xeb'ek k'u ri', y ri Jesús katzijon chupa taq ri sinagogas che taq ronoje ri luwar re Galilea yey keb'eresaj k'u b'i itzel uxlab'ixel.

*Ri Jesús kukunaj jun achi k'o ri yab'il lepra che
(Mt. 8:1-4; Lc. 5:12-16)*

⁴⁰ Xopon k'u ruk' ri Jesús jun achi k'o ri yab'il lepra che y xuxukub'a' rib' chwach. Lik xelaj k'u che, jewa' xub'i'ij:

—We ka'aj ko la, josq'ij la ri nucuerpo che wa yab'il —xcha'.

⁴¹ Ek'u ri Jesús xjuch' ka'n uk'u'x che rachi yewa'. Xuchap pana ruk' ruq'ab' y jek'uwa' xub'i'ij che:

—Kuaj, chu'ana b'a chom ri' racuerpo —xcha'.
42 Xew k'u xuk'is ub'i'xikil wa', xa pa joq'otaj ri
 yab'il xsachik y rachi xkunutajik.

43 Ek'uchiri', ri Jesús xuk'isb'ej ruch'a'tem ruk' y
 lik xupixab'aj, **44** jawa' xub'i'ij che:

—Chatape', mak'o matzijoj che junqo. Jat
 chwach raj chakunel pa Rocho Dios cha' rire kar-
 ilo na jinta chi lepra chawe. Y ruma rajoq'ikil,
 chaya'a k'u chwach ri Dios ri qasa'n xtaqan kan ri
 Moisés che,* cha' kaq'alajin chikiwach ri tikawex
 at kunutajinaq chik —xcha'.

45 No'j la'chi echiri' xe'ek, lik xujeq utzijoxik ri
 xu'an ri Jesús che y jek'ula' lik xtataj wa' kuma ri
 winaq. Ruma k'u ri', na utz ta chik kok ri Jesús chi-
 wachil pa ri tinamit; xujeq k'u kakanaj kan chin-
 imanaj che ri tinamit pa taq luwar katz'intz'otik.
 Na ruk' ta k'u ri', uk'iyal tikawex re ronoje luwar
 xeb'opon ruk'.

2

Ri Jesús kukunaj jun sik *(Mt. 9:1-8; Lc. 5:17-26)*

1 Echiri' ik'owinaq chi keb' oxib' q'ij, xok tanchi
 ub'i ri Jesús pa ri tinamit Capernaúm. Taq ri winaq
 xkito Rire k'o chuchi' jun ja. **2** Y na jampatana
 xemolotaj uk'iyal winaq y ruma ri kik'iyal na
 keb'ok ta chi ne chuchi' ri puerta. Ek'u ri Jesús
 kutzijoj Ruch'a'tem ri Dios chike.

3 Ek'uchiri', xek'un kajib' achijab' kitelem lo
 jun achi sik. **4** Yey na xkiriq taj su'anik kakiya
 pan chwach ri Jesús kuma ruk'iyal winaq. Ewi

* **1:44** Lv. 14:1-32

xkiteq'eb'a' ruwi ri ja pa k'o wi ri Jesús, xkesaj julepaj che. Chiri' k'u ri' xkiqasaj wub'i la ch'at pa k'otz'ol wi ri sik.

⁵ Ek'u ri Jesús echiri' xril ri kub'ulib'al kik'u'x ruk', jewa' xub'i'ij che ri sik:

—Wal, ronoje ramak kuytajinaq chik —xcha'.

⁶ Chiri' k'ut etz'ul jujun aj k'utunel re ri tzi-jpixab'y jewa' katajin chikik'u'x: ⁷ «¿Su'chak jewa' kach'a't wa'chi? Ruk' wa kub'i'ij kamakun chirij ri Dios. Ma ¿na xew ta neb'a ri Dios aj kuyul mak?»

⁸ Chupa k'u la' la joq'otaj, ri Jesús xuna'b'ej sa' la kakich'ob'o; rumá k'u ri', xub'i'ij chike:

—¿Su'chak jela' katajin chik'u'x alaq? ⁹ ¿Sa' k'u ri na k'ayew taj kamb'i'ij che rachi sik: “Ronoje ramak kuytajinaq chik” o “Chatyaktajoq, chak'ama b'i rach'at y chatb'inoq”? ¹⁰ E kuaj k'ut keta'maj alaq wa': Ralaxel Chikixo'l Tikawex ya'tal puq'ab' kukuy taq ri mak ke ri winaq che ruwachulew — xcha'.

¹¹ Xub'i'ij k'u ri' che ri sik:

—Chatyaktajoq, chak'ama b'i rach'at y jat cha'wocho —xcha'.

¹² Na jampatana xyaktaj rachi, xutelej b'i ruch'at y chikiwach konoje xel b'i. Konoje k'u ri' xkam kanima' che la xkilo y xkijeq kakiyak uq'iij ri Dios, jewa' kakib'i'ij: «¡Na jinta k'ana qilom wi wa'!» kecha'.

*Ri Jesús kusik'ij ri Leví
(Mt. 9:9-13; Lc. 5:27-32)*

¹³ Tek'uchiri', xe'ek tanchi ri Jesús chuchi' ri mar. Konoje ri winaq xeqib' ruk', y Rire xujeq kak'utun chikiwach. ¹⁴ Ek'u ri' katajin rik'owik pa ri luwar pa ka'an wi ri tojonik che ri gobierno, xril

pana jun aj tz'onol puaq re tojonik tz'ul chirij'. Wa' Leví rub'i'* yey uk'ajol ri Alfeo. Xub'i'ij k'u ri Jesús che:

—Chat-terej lo chwiji —xcha'!

Xyaktajik k'u ri Leví y xterej b'i chirij.

¹⁵ Ek'u ri Jesús xumaj b'i chirocho ri Leví. Xeb'ok k'u chwa ri mexa kuk' rutijo'n, junam kuk' uk'iyal aj tz'onol puaq re tojonik y uk'iyal aj makib'; ma lik e k'i ri kiternab'em b'i.

¹⁶ Ek'u raj k'utunel re ri tzijpixab' kuk' ri fariseos, echiri' xkilo kawa' ri Jesús kuk' raj makib' y raj tz'onol puaq re tojonik,† xkib'i'ij chike rutijo'n ri Jesús:

—¿Su'chak ri tijonel iwe ri'ix kawa' junam kuk' raj tz'onol puaq re tojonik yey kuk' raj makib'? —xecha'.

¹⁷ Echiri' xuta wa' ri Jesús, xub'i'ij chike:

—E janipa ri utz kiwach, na kajawax ta aj kunanel chike; ma wa' xew chike ri e yewa'ib' kajawax wi. Jela' k'u ri', ri'in na in petinaq ta che kisik'ixik ri jusuk' kib'inik kisilab'ik, ma e in petinaq che kisik'ixik raj makib' —xcha'.

Ri tz'onob'al puwi ri ayuno

(Mt. 9:14-17; Lc. 5:33-39)

¹⁸ Rutijo'n ri Juan Aj Ya'l Bautismo y ri kitijo'n ri fariseos echiri' e k'o pa ayuno, xeb'opon ruk' ri Jesús y xkitz'onoj che:

—¿Su'b'e rutijo'n ri Juan y ri kitijo'n ri fariseos lik kaki'an ayuno, yey ri tijo'n rilal na kaki'an ta wa'? —xecha'.

* ^{2:14} Wa jun achi k'o keb' ub'i': Leví y Mateo. Mt. 9:9; Lc. 5:27

† ^{2:16} “Raj tz'onol puaq re tojonik”: Kil “cobrador de impuestos” pa vocabulario.

19 Ri Jesús xuk'ul uwach:

—¿Ub'e nawi kaki'an ayuno ri esik'im pa juna k'ulanikil we rala kak'uli'ik k'a k'o kuk'? Na ub'e taj, ma k'a k'o rala chikixo'l. **20** No'j kopon na ri q'ij echiri' kesax b'i rala chikixo'l; k'a ek'uchiri', kaki'an ayuno.

21 »Na jinta junq'uk'oj ruq'u' q'e'l ruk'k'ojob'al k'asaq; ma ri k'ojob'al k'asaq, we xk'olotaj upa, e kujek' ri k'ul q'e'l y más ne kurich'ij b'i. **22** Jek'ula' ri vino k'ak' na kaq'ej ta chupa juna surun‡ q'e'l. Ma we ka'ani' wa', ri vino k'ak' echiri' kanajtir uq'ij, kuraqij ri surun, katix k'u ri' ri vino y ri surun na jinta chi uchak. Ruma k'u la', ri vino k'ak' 'anom chirajawaxik wi kaq'ej chupa juna surun k'asaq —xcha'.

Ri Jesús e rajaw ri q'ij re uxlanib'al

(Mt. 12:1-8; Lc. 6:1-5)

23 Chupa k'u jun q'ij re uxlanib'al, ri Jesús kuk'rutijo'n e ri' keb'ik'ow pa taq' tiko'n re trigo. Ek'u rutijo'n xkijeq kakich'upila' b'i ri trigo.

24 Ruma wa' ri fariseos xkitz'onoj che ri Jesús:

—Chilape la, ¿su'b'e ri tijo'n la kaki'an ri na taq' taj ka'ani' chupa ri q'ij re uxlanib'al? —xecha'.

25 Ek'u ri Jesús xuk'ul uwach:

—¿Na ajilam ta neb'a alaq ri xu'an ri David kuk'ri rachb'l'il echiri' k'o xajawax chike y xenumik?

26 Echiri' ri Abiatar e kajawal raj chakunel pa Rocho Dios, ri David xok pa ri Rocho Dios y xutij ri pam ya'tal chi puq'ab' ri Dios,* ye y wa' na taq' ta chike rike kakitijo. Na ruk' ta k'u ri', xuya ne ke

‡ **2:22** “Surun”: Kil “odre” pa vocabulario. * **2:26** 1 S. 21:1-6

ri e rachb'i'il. Yey wa' wa pam, xew taqal chike raj chakunel pa Rocho Dios —xcha'.

²⁷ Y jewa' xub'i'ij tanchi chike:

—Ri q'ij re uxlanib'al xuya kan ri Dios re to'b'al ke ri tikawex; na e ta xe'ani' ri tikawex rumá ri q'ij re uxlanib'al. § ²⁸ Yey Ralaxel Chikixo'l Tikawex e ne rajaw ri q'ij re uxlanib'al —xcha'.

3

Ri Jesús kukunaj jun achi chaqijinaq uq'ab'

(Mt. 12:9-14; Lc. 6:6-11)

¹ Jumul chik ri Jesús xok chupa ri sinagoga y chirí' k'o jun achi chaqijinaq jun uq'ab'. ² E k'o k'u jujun lik kik'ak'alem we ri Jesús kukunaj wa'chi chupa wa q'ij re uxlanib'al, cha' jela' utz kakitz'aq uechi'.

³ Xub'i'ij k'u ri Jesús che rachi chaqijinaq ruq'ab':

—Chatyaktajoq y chatk'ola chiqawach qonoje —xcha'.

⁴ Ek'uchiri', xutz'onoj chike ri kakitzutza':

—¿Sa' ri lik usuk' ka'ani' pa ri q'ij re uxlanib'al: E ka'ani' ri utz o e ri na utz taj? ¿Utz kakolob'ex ruk'aslem junooq o kaya' luwar che kakamik? —xcha'. Yey na jinta k'u junooq chike xk'uluw uwach.

⁵ Ek'uchiri', ri Jesús xeb'utzu' ruk' oyowal taq ri kisutum rij y lik xok b'is chuk'u'x rumá lik u'anom ko ri kania'. Xub'i'ij k'u che rachi:

—Chasuk'upij raq'ab' —xcha che.

Rachi xuyuq ruq'ab' y wa' xutzirik.

§ **2:27** Ri Jesús xub'i'ij wa' ma ri fariseos e xki'an más il uwach che ri kitaqanik puwi ri q'ij re uxlanib'al, chwa ri kato' ri tikawex chupa wa' wa q'ij.

6 Xeb'el k'u b'i ri fariseos, xkimol kib' kuk' ju-jun chike ri kitaqem ri rey Herodes, y junam xkich'a'tib'ej su'anik kakisach uwach ri Jesús.

Uk'iyal tikawex kakitzukuj ri Jesús

7 Ri Jesús xel b'i y xe'ek chuchi' ri mar junam kuk' rutijo'n. Y uk'iyal tikawex xeterej b'i chirij. Wa'e petinaq pa taq ri tinamit re Galilea y re Judea **8** y pa ri tinamit Jerusalem; e petinaq pa taq ri tinamit re Idumea, pa taq ri tinamit e k'o ch'aqa ya' che ri nimaya' Jordán, yey pa taq ri tinamit e k'o chunaqaj ri tinamit Tiro y ri tinamit Sidón. Konoje wa' e petinaq ruma xkito janipa ri katajin ri Jesús che u'anik.

9 Ek'u ri Jesús xub'i'ij chike rutijo'n, xaqi kiy-ijb'a' na ri barco re kaq'ax chupa we xajawax che, cha' jela' na kapitz'ipo'x ta kuma ruk'iyal winaq; **10** ma lik e k'i ri xeb'ukunaj. Jek'ula' konoje ri yewa'ib' kakiminima' kib' ruk', ruma kakaj ka-kichapo cha' kekunutajik.

11 Ek'u ri winaq e k'o pakiq'ab' itzelilaj uxlab'ixel, echiri' kakil uwach ri Jesús, kexuki' chwach y kesik'inik kakib'i'ij: «¡Rilal lal Ruk'ajol ri Dios!» kecha!. **12** No'j ri Jesús lik keb'uq'atej cha' na kakiq'alajisaj taj china Rire.

Ri Jesús keb'ucha' kab'lajuj utaquo'n

(Mt. 10:1-4; Lc. 6:12-16)

13 Tek'uchiri', xaq'an ri Jesús chwa jun juyub' y xeb'usik'ij china taq ri xraj keb'ucha'o, y rike xkimol kib' ruk'. **14** Xeb'ucha' k'u kab'lajuj chike wa' cha' kek'oji' ruk' y keb'utaq b'i che utzijoxik ri Utzilaj Tzij. **15** Y xuya b'i kichuq'ab' re kekikunaj yewa'ib' y re keb'ekesaj b'i itzel uxlab'ixel.

16 Ek'u kib'i' wa' wa kab'lajuj* xeb'ucha'o:
 Simón ri xkoj Pedro che,
17 Jacobo
 y ruchaq' Juan (rike e uk'ajol ri Zebedeo y xkoj ne
 kib'i' "Boanerges", wa' ke'elawi "E ralk'o'al
 ruch'awib'al jab"),
18 Andrés,
 Felipe,
 Bartolomé,
 Mateo,
 Tomás,
 Jacobo ruk'ajol ri Alfeo,
 Tadeo,†
 Simón, ri kab'i'x che "ri Cananista",‡
19 y Judas aj Iscariot,§ ri xk'ayin re ri Jesús.

*Kab'i'x che ri Jesús e uchuq'ab' ritzel ri k'o ruk'
 (Mt. 12:22-32; Lc. 11:14-23)*

20 Tek'uchiri', xok ri Jesús chuchi' jun ja y xe-
 molotaj tanchi uk'iyal winaq. Y ruma k'u ri',
 ri Jesús kuk' rutijo'n na utz ta chi ne kewa'ik.
21 Echiri' xkita ri ratz-uchaq' ri Jesús, xek'unik y
 xkaj kakik'am b'i kuk', ma rike kakib'i'ij xsach
 runa'oj ri Jesús. **22** No'j raj k'utunel re ri tzijpixab',
 ri e petinaq Jerusalem, xkib'i'ij: «Ri Jesús k'o
 puq'ab' ri Beelzebú» y «Ruma k'u ruchuq'ab' wa'
 wa kajawal ri itzel uxlab'ixel, keb'eresaj b'i itzel
 uxlab'ixel» xecha!.

* **3:16** Kab'i'x "taqo'n" chike wa kab'lajuj utijo'n ri Jesús, ri xecha'
 ruma Rire cha' kakitzijoj ri Utzilaj Tzij. Pa ri ch'a'tem griego y pa
 kaxtila wa' e "apóstol". † **3:18** "Tadeo": Ri Tadeo también kab'i'x
 "Lebeo" y "Judas" che. Mt. 10:3; Lc. 6:16 ‡ **3:18** "Cananista":
 Kil "Zelote" pa vocabulario. § **3:19** "Iscariot": Wa' e utinamit ri
 Judas.

23 Ek'u ri Jesús xeb'usik'ij y ruk' k'amb'al na'ojoj xub'i'ij chike:

«¿Sa' nawi we ta ri Satanás karesaj b'i ri Satanás chike ri winaq? **24** We ri taqanelab' re juna tinamit kijachom kipa ruma kech'o'jin chikiwach, ri' na ketiki' ta chi utz. **25** Yey we ri ejeqelet pa juna ja kijachom kib' ruma kech'o'jin chikiwach, ri' na ketiki' ta chi utz. **26** Jek'ula', we ta ri Satanás kayak-taj chirib'il rib' y utukel kujach upa rutaqanik, ri' na kanajtir ta rutaqanik, xa kasach uwach.

27 »Na jinta k'u juna eleq'om kok pa rocho junog lik k'o uchuq'ab' yey kareleq'aj k'u lo rub'itaq re pa ja, we na kuyut ta nab'e ri rajaw ja. Ma we releq'om uyutum chi ri rajaw ja, k'a ek'uchiri' utz kareleq'aj b'i ronoje la k'o pa ri ja.

28 Paqatzij wi kamb'i'ij chiwe: K'o puq'ab' ri Dios kukuy ronoje taq ri mak ke ri tikawex, ruk' ronoje taq ri na utz taj kakib'i'ij, tob' china chirij; **29** no'j china ri tzel kach'a't chirij ri Santowilaj Ruxlab'ixel ri Dios, ri' na kakuytaj ta k'ana umak. Ma ri ka'anaw wa', k'o chi ri q'atb'al tzij puwi' na jinta utaqexik» xcha'.

30 Xub'i'ij wa' ma rike kib'i'im: «Rire k'o puq'ab' jun itzelilaj uxlab'ixel.»**

Ruchu y taq ruchaq' ri Jesús (Mt. 12:46-50; Lc. 8:19-21)

31 Tek'uchiri', ruchu y taq ruchaq' ri Jesús xek'unik y xek'ojil' lo pa b'e, yey xkitaq usik'ixik ri Jesús.

** **3:30** Ri mak chirij ri Santowilaj Ruxlab'ixel ri Dios e ruma xkib'i'ij: "Ruchuq'ab' ri Jesús petinaq ruk' ritzel winaq", pero na e ta u'anom ma e uchuq'ab' ri Ruxlab'ixel ri Dios ri k'o ruk'.

³² Ek'u ri tikawex etz'ulik, ri kisutum rij ri Jesús, jewa' xkib'i'ij che:

—Ri chu la y taq ri chaq' la e k'o pa b'e, e la' kakitzukuj la —xecha che.

³³ Ek'u ri Jesús xuk'ul uwach:

—¿China ri nuchu y china taq ri nuchaq'? —xcha'!

³⁴ Tek'uchiri', xeb'utzu' ri etz'ulik kisutum rij y jewa' xub'i'ij chike:

—Wa e k'o wara e nuchu y e taq nuchaq' ri'.

³⁵ Ma china ri ku'an janipa ri karaj ri Dios, wa' e nuchaq', e wanab' y e nuchu ri' —xcha'!

4

*Ri k'amb'al na'oj puwi ri awanel
(Mt. 13:1-9; Lc. 8:4-8)*

¹ Ri Jesús xujeq tanchi kak'utun chuchi' ri mar y lik e k'i ri tikawex xemolotaj chirí' pa k'o wi Rire. Ruma k'u ri' xok chupa jun barco k'o chwi ri mar, xtz'uyi' chupa y konoje ri tikawex e k'o pana chuchi' la mar. ² Xujeq k'u kak'utun chikiwach ruk' uk'iyal taq k'amb'al na'oj, yej jun che taq ruk'utunik e wa':

³ «¡Chitape!! K'o jun awanel xel b'i cha' ke'awanoq. ⁴ Ek'uchiri' katajin che ujopopexik rija',* k'o xtzaq kan chuchi' ri b'e. Xek'un k'u lo tz'ikin, y xo'lkitija b'i.

⁵ »K'o ija' xtzaq kan pa taq ab'aj; yej ruma na jintu uk'iyal ulew chuxe', xel tan lo rija'.

* ^{4:4} E rojertan chila' Israel echiri' kaki'an rawanik re ri trigo xa kakijopopej rija' pulew, tek'uchiri' kakich'uq uwi' ruk' ulew.

6 Ek'uchiri' xel lo ri q'iij, xk'atik; yey ruma na jinta ratz'ayaq, xchaqijik.

7 »K'o ija' xtzaq kan pa taq k'iix. Echiri' ri k'iix xk'iyik, rija' xjiq' kan chuxe'; ruma k'u ri', na jinta reqa'n xuya'o.

8 »No'j k'o ija' xtzaq kan pa chomilaj ulew. Ek'u ri' wa' xel loq, xk'iyik y lik xu'an reqa'n. K'o jujun raqan xuya treinta, jujun chik xuya sesenta y k'o ne xuya jun ciento» xcha'!

9 Ek'uchiri', ri Jesús xub'i'ij tanchi chike: «China k'u ri k'o utanib'al che utayik, ¡chuta k'u ri'!» xcha'.

*Sa' ruchak taq ri k'amb'al na'oj
(Mt. 13:10-17; Lc. 8:9-10)*

10 Echiri' ri Jesús xkanaj kan utukel, ri e k'o chunaqaj y ri kab'lajuj utijo'n xeqib' ruk', xkitz'onoj k'u che sa' ke'elawi wa k'amb'al na'oj xuya chike.

11 Ek'u ri Jesús xub'i'ij chike:

«Chiwe ri'ix ya'talik kaq'alajisax runa'oj ri Dios chwi rutaqanik. No'j chike taq ri winaq na e jinta chupa rutaqanik, xa ruk' taq k'amb'al na'oj kab'i'x ronoje chike. **12** Ma tob' rike ketzu'nik, e junam ruk' na ketzu'n taj; tob' ketanik, e junam ruk' na ketan taj y e ri' na jinta k'o kakimaj usuk'. Na kakaj ta k'u ri' kakitzelej kitziij cha' jela' kakuytaj kimak»* xcha'.

*Ri Jesús kuq'alajisaj ri k'amb'al na'oj puwi ri awanel
(Mt. 13:18-23; Lc. 8:11-15)*

13 Ek'uchiri', xutz'onoj chike:

* **4:12** Is. 6:9-10

«¿Na kimaj ta kami usuk' ri' wa k'amb'al na'oj?
¿Sa' k'u u'anik ri' kimaj usuk' ronoje taq ri k'amb'al
na'oj kank'ut chiwach?

¹⁴ »Ri awanel e pacha' ri katikow Ruch'a'tem ri
Dios.

¹⁵ »E k'o k'u jujun tikawex e pacha' rija' xtzaq
kan chuchi' ri b'e; wa' xtik Ruch'a'tem ri Dios
pa kanima' y kakita ne ri'. Pero kak'un k'u lo ri
Satanás y kumaj b'i ri Ch'a'tem xtiki' pa kanima'.

¹⁶ »E k'o jujun chik e pacha' rija' xtzaq kan pa
taq ab'aj. Wa' e ri kakita Ruch'a'tem ri Dios y na
jampatana kakik'ul ruk' ki'kotemal. ¹⁷ Pero ruma
na e tikil ta chi utz, na kekowin taj. Ma echiri'
kak'un lo ri k'amb'al kipa o keternab'ex ruk' k'ax
ruma kik'ulum Ruch'a'tem ri Dios, kepajtaj k'u ri'.

¹⁸ »E k'o jujun chik e pacha' rija' xtzaq kan pa taq
k'iix. Wa' e ri ketaw Ruch'a'tem ri Dios. ¹⁹ Pero
rub'is kik'u'x chwi taq ri kajawax chike, ruk' ri
sokoso'nik re ri b'eyomalil y ri kirayib'al che taq
ronoje ri k'olik; ronoje k'u wa' e kusach uwach
Ruch'a'tem ri Dios k'o pa kanima'. Ruma taq
k'u ri' wa' na jinta k'ana kijiq'ob'alil kilitaj che ri
kib'inik.

²⁰ »E k'o k'u jujun e jela' pacha' rija' xtzaq pa
chomilaj ulew. Wa' e ri kakita Ruch'a'tem ri Dios,
kakik'ul chi utz y lik k'o kijiq'ob'alil kilitaj che ri
kib'inik. E jela' pacha' rija' lik xu'an reqa'n; k'o
jujun raqan xuya treinta, jujun chik xuya sesenta
y k'o ne xuya jun ciento» xcha'!

*Ri k'amb'al na'oj puwi ri candil
(Lc. 8:16-18)*

²¹ Ri Jesús xub'i'ij tanchi chike:

«¿K'o neb'a junoq kutzij juna aq' y kuch'uq uw'i ruk' juna mulul re pajb'al o kuju' chuxe' ruwarab'al? ¿Na re ta neb'a kuya lo chupa ruk'olib'al chikaj? ²² Ma kopon ri q'ij echiri' janipa ri na q'alajisam taj, kaq'alajisax na; yej janipa ri ewatalik, keta'maxik. ²³ China k'u ri k'o utanib'al che utayik, ichuta k'u ri!» xcha'!

²⁴ Jawa' xub'i'ij tanchi chike:

«Lik chita chi utz janipa ri kamb'i'ij chiwe, ma “ruk' ri pajb'al kixpajan wi ri'ix, ruk' tanchi wa pajb'al ka'an pajanik chiwe.” Ek'u ri Dios kuya na chiwe lik kimaj usuk' ri kamb'i'ij, we lik e kita ri nutzij. ²⁵ Ma china ri kuk'ul chi utz janipa ri kak'ut chwach, ri' kak'ut ne más chwach y jek'ula' kumaj más. Yey china ri na kuk'ul ta ri kak'ut chwach, ri' kamaj ne che janipa ri kuch'ob'o umajom chi usuk'» xcha ri Jesús.

Ri k'amb'al na'oj puwi ruk'iyib'al rija'

²⁶ Xub'i'ij tanchi ri Jesús chike:

«Rutaqanik ri Dios e jela' pacha' juna achi kutik rija' pulew. ²⁷ Rachi chaq'ab' ke'waroq y paq'ij kawa'lij tanchik; yej na kumaj ta usuk' su'anik kel lo rija' y kak'iyik. ²⁸ Ma rulew utukel ku'an rib' che uk'iyisaxik ri tiko'n. Nab'e na e kel lo ri raqan ri tiko'n, teran k'u lo rutzik'; tek'uchiri', kawachinik. ²⁹ Ek'uchiri' ya xri'job'ik, katzaq b'i ri jos che ma e ri' xopon ruq'ijol molonik» xcha'.

Ri k'amb'al na'oj puwi rija' re moxtasa (Mt. 13:31-32; Lc. 13:18-19)

³⁰ Xub'i'ij tanchi ri Jesús:

«¿Sa' ruk'kaqajunimaj wi rutaqanik ri Dios, o sa' juna k'amb'al na'oj kuq'alajisaj wa'? ³¹ E pacha'

rija' re moxtasa echiri' katik pulew. Ma e ija' wa' más ch'uti'n chwa taq rija' k'o che ruwachulew, ³² pero echiri' tikital chik, we xk'iyik más kanimar chwa taq ri tiko'n k'o pa ri werta. Kel k'u lo nimaq taq uq'ab' y kek'un lo ri tz'ikin kexik'ik' che ruwa kaj y kejeqi' chuxel rumu'j» xcha'.

*Su'b'e ri Jesús kak'utun ruk' taq k'amb'al na'ojoj
(Mt. 13:34-35)*

³³ Ruk' uk'iyal taq k'amb'al na'ojoj pacha' taq wa', xk'utun ri Jesús puwi Ruch'a'tem ri Dios, e chirij ri kakimaj usuk' ri winaq. ³⁴ Y na jinta k'o xuk'utu we na ruk' ta k'amb'al na'ojoj xu'ano; no'j chike rutijo'n xuq'alajisaj ronoje echiri' e k'o kitukel.

*Ri Jesús kuq'atej ri kaqjiq' chwi ri mar
(Mt. 8:23-27; Lc. 8:22-25)*

³⁵ Chupa k'u la' la jun q'ij echiri' xok raq'ab', ri Jesús xub'i'ij chike rutijo'n:

—Jo', chojq'ax ch'aqa ya' —xcha chike.

³⁶ Echiri' eb'uch'a'b'em chi kan ruk'iyal winaq, rutijo'n xkik'am b'i ri Jesús e la' chupa ri barco pa tz'ul wi Rire, yej e k'o chi jujun barcos ekachb'ilam b'i.

³⁷ Xpe k'u jun nimalaj kaqjiq' chwi ri mar. Ek'u ri ya' kuroj rib' che ri barco; y wa' xujeq kanoj che ya', ya laj kamuqutajik. ³⁸ Ek'u ri Jesús k'o pa ri barco puk'isb'al re chirij, kawar chwi jun ch'akat.

Rutijo'n xe'kik'osoj y jewa' xkib'i'ij che:

—¡Qajawal! ¿Na kok ta kami la il chiqe? ¡Ma ya kojkamik! —xecha'.

³⁹ Ek'u ri Jesús xyaktajik, xuq'atej ri kaqjiq' y jewa' xub'i'ij che ri ya':

—¡Chat-tanaloq! ¡Chatkub'uloq! —xcha che. Ri kaqjiq' xtani'ik y ri ya' xyeni'ik.

⁴⁰ Tek'uchiri', xub'l'iij chike rutijo'n:

—¿Su'chak lik kixi'ij iwib'? ¿Su'b'e na kub'ul ta ik'u'x wuk'? —xcha chike.

⁴¹ Ewi xok lo jun xi'in ib' kuk' y xkib'iij chiki-wach:

—¿Sa'ruwach wa'wa'chi? ¡Ma tob' ne e ri kaqjiq' y ri ya' kakikoj utzij! —xecha'.

5

*Jun achi aj Gadara k'o puq'ab' jun itzel uxlab'ixel
(Mt. 8:28-34; Lc. 8:26-39)*

¹ Xeb'opon k'u ch'aqa ya' pa ri luwar re Gadara.

² Echiri' xel lo ri Jesús chupa ri barco, na jampatana xo'llk'ul rumá jun achi elinaq lo chuxo'l taq muqub'al ke anima', yey wa' k'o puq'ab' jun itzelilaj uxlab'ixel.

³ Wa' wa'chi jeqel pa kemuq wi ri anima' y na jinta chi k'ana junoq kach'ijow uximik, tob' ne ruk' karena. ⁴ Ma lik uk'iyal laj xyut ri raqan y ruq'ab' ruk' taq ch'ich' y karena; pero riire kuraqara' upa, ku'an uk'aj che y na jinta k'o kach'ijow uchuq'ab'. ⁵ Chipaq'ij chichaq'ab' xaqi kasutin chwi taq ri juyub' y chuxo'l taq muqub'al ke anima', kasik'inik y ku'an k'ax che rib' ruk' ab'aj.

⁶ Ek'uchiri' chinimanaj xril pana ri Jesús, kak'alalik xqib' ruk' y xuxukub'a' rib' chwach.

⁷ Y lik ko xch'awik, jefa' xub'l'iij:

—¿Su'chak ko'lmina ib' la wuk', Jesús lal Uk'ajol ri Dios k'o chila' chikaj? Kantz'onoj k'u che'la pa rub'i' ri Dios, minya la pa k'ax —xcha'.

8 Xub'i'ij wa' ma ri Jesús xub'i'ij che: «At itzelilaj uxlab'ixel, chatelub'i che wa'chi» xcha'!

9 Ek'u ri Jesús xutz'onoj che:

—¿Sa' rab'i? —xcha che.

Rire xuk'ul uwach:

—Legión* ri nub'i!, ma lik oj k'i —xcha'. **10** Yey ritzelilaj uxlab'ixel lik xukoj rib' chwach ri Jesús cha' na ketaq tub'i k'a naj che taq la' la luwar.

11 Xa chirí' k'u ri' e k'o lo uk'iyal aq kewa' chwa ri juyub'. **12** E taq k'u ri itzelilaj uxlab'ixel xkikoj kib' chwach ri Jesús y jewa' xkib'i'ij che:

—Chojtaqa b'i la kuk'la aq cha' kojok b'i kuk' —xecha'.

13 Y ri Jesús xuya luwar chike. Xeb'el k'u b'i che rachi y xeb'ok b'i kuk' ri aq. Wa' wa aq laj e jun keb' mil. Ek'u la' konoje xe'kik'aqa b'i kib' chwi jun siwan, xeb'e'tzaq k'a chupa ri mar y chirí' xejiq' wi.

14 Ek'u ri e chajinel ke ri aq, xeb'animajik. Y janipa ri xkilo xeb'ek che utzijoxik chupa ri tinamit y pa taq juyub'.

Xepe k'u ri winaq che rilik sa' ri x'ani' chirí'.

15 Echiri' xek'un pa k'o wi ri Jesús, xkil rachi ri lik x'an k'ax che kuma ritzelilaj uxlab'ixel; e ri' tz'ulik, ukojom chi uq'u' y jusuk' chi runa'oj. Ruma wa', lik xkixi'ij kib'.

16 Y ri xeb'ilow wa' xkitzijoj chike ri k'ak' xek'unik; xkitzijoj su'anik xeb'el b'i ritzelilaj uxlab'ixel che rachi y sa' ri xkik'ulumaj taq ri aq.

* **5:9** “Legión”: Wa ch'a'tem ke'eloq “uk'iyal soldados”. Jun legión e k'o waqib' mil soldados che. Wara ke'elawi uk'iyal itzel uxlab'ixel.

17 Ewi ri winaq xkijeqo keb'elaj che ri Jesús cha' kel b'i chirij pa taq ri kiluwar.

18 Ek'uchirij', ri Jesús xok b'i chupa ri barco. Ek'u rachi eb'elinaq b'i ritzelilaj uxlab'ixel che, xelaj che ri Jesús cha' kuya luwar che katerej b'i chirij. **19** No'j ri Jesús na xuya ta luwar che, jenewa' xub'i'ij che:

—Jat cha'wocho kuk' rawatz-achaq' y chatzijoj chike ronoje ri utz u'anom ri Dios awuk', ma e xuk'ut ri k'axna'b'al uk'u'x chawé —xcha che.

20 Rachi xe'ek y xujeq utzijoxik pa ri tinamit re Decápolis† ronoje ri utz x'an che rumá ri Jesús, y konoje ri tikawex lik kakam kanima' che wa'.

*Rumi'al ri Jairo yey rixoq xuchap ruq'u' ri Jesús
(Mt. 9:18-26; Lc. 8:40-56)*

21 Echirij' xtzelej tanchi ri Jesús ch'aqa ya' chupa ri barco, uk'iyal tikawex xkimok rij y Rire xk'ojo' chuchi' ri mar.

22 Xk'un k'u lo jun achi Jairo rub'i', rire e jun chike ri e aj wach re ri sinagoga. Xew k'u xril uwach ri Jesús, xuk'aq rib' xe'raqan uq'ab'. **23** Y lik xukoj rib' chwach, jewa' xub'i'ij che:

—Ri numi'al kajek'owik. Jo' ko la wuk', ke'ya'a ri q'ab' la puwi' cha' kakunutajik y jela' na kakam taj —xcha'.

24 Xe'ek k'u ri Jesús ruk' rachi, yey uk'iyal winaq xeterej b'i chirij y lik kakipitz'ipa'.

25 Chikixo'lib'al k'u ri' k'o jun ixoq lik yewa', e kab'lajuj lo junab' ri' na katani' ta ruyab'il re upa ik' che. **26** Y lik utijom k'ax pakiq'ab' uk'iyal e aj kun, y uk'isom chi ne ronoje ri k'o ruk'; yey na

† **5:20** “Decápolis” e ke'elawi “lajuj tinamit”.

jinta k'ana xutiqoj che, ma katajin ne unimitajik ri jujun q'ij.

²⁷ Echiri' xuta ri kakib'i'ij puwi ri Jesús, xumin b'i rib' chikixo'lib'al taq ri winaq. Xqib' k'u pana chirij ri Jesús y xuchap ruq'u', ²⁸ ma xuch'ob' pa ranima': «Tob' tane xew lu'q'u' kanchapo, ruk' ri' kinkunutajik.» ²⁹ Y na jampatana xtani' ruyab'il y lik xuna' chirib'il rib' xkunutaj che ri k'axlaj yab'il k'o wi.

³⁰ Ek'u ri Jesús echiri' xuna' chirib'il rib' k'o uchuq'ab' xelik, xeb'utzu' konoje ri winaq y xutz'onoj:

—¿China xchapaw ri nuq'u'? —xcha'!

³¹ Rutijo'n xkib'i'ij che:

—Rilal kil la ri winaq kakipitz'ipa' la. ¿Su'chak k'u ri' katz'onoj la: “China xchapaw we'in”? —xecha che.

³² Pero ri Jesús xtzu'n pa taq utzal che rilik china xchapaw re. ³³ Ek'u rixoq kab'irb'ot rumá xi'in ib', ma rire e eta'mayom sa' ri xuk'ulu. Xe'ek k'ut y xuxukub'a' rib' xe'raqan uq'ab' ri Jesús. Yey xutzijoj che Rire ronoje ruk'ulumam y sa' ri xu'an la joq'otaj.

³⁴ Ek'u ri Jesús xub'i'ij che:

—Ixoq, rumá ri kub'ulib'al k'u'x la wuk', xkunutaj la. Oj k'u la ri' chi utzil chomal, ma lal chi kunutajinaq che ri k'axk'olil la —xcha'!

³⁵ K'a kach'a't ne ri Jesús echiri' xek'un lo jujun achijab' e petinaq chirocho ri aj wach re ri sinagoga y xo'l'kib'i'ij che:

—Ri mi'al la ya xkamik; na jinta chi kutiqoj kab'ayab'a' la ri tijonel —xecha che.

36 Ek'u ri Jesús, echiri' xuta wa xo'llb'i'xoq, xub'i'ij che raj wach re ri sinagoga:

—Muxi'ij rib' k'u'x la, xew lik kub'ula k'u'x la wuk' —xcha che.

37 Ri Jesús na xuya ta chi luwar che junoq katerej b'i chirij; xew xeb'uk'am b'i ri Pedro, ri Jacobo y ri Juan ruchaq' ri Jacobo ruk'. **38** Ek'uchiri' xopon chirocho raj wach re ri sinagoga, xeril ri winaq ketukukik, keb'oq'ik y ruk' sik' ketunanik. **39** Ek'u ri Jesús xok b'i y xub'i'ij chike:

—¿Su'b'e lik kixtukukik y kixoq'ik? Ri ralko ali na kaminaq taj, xa kawarik —xcha chike.

40 Yey xa xkitze'ej k'u ri xub'i'ij. Pero Rire xeb'eresaj lo konoje ri e k'o pa ja, xew xeb'ukoj b'i ruchu-uqaw ri ralko ali kuk' rutijo'n eteran b'i chirij. Xok k'u b'i pa telan wi ri ralko ali. **41** Xuchap k'u ruq'ab' y jewa' xub'i'ij pa ri ch'a'tem arameo:

—¡Talita kumi! —xcha che. (Wa' e ke'elawi: “Ali chuuy, ¡Chatwa'lijoq!”)

42 Y na jampatana ri ralko ali xwa'lilik y xb'inik. (Rali kab'lajuj rujunab'.) Y ri winaq lik xkixi'ij kib' che wa xkilo. **43** Ek'u ri Jesús lik xpixab'an che cha' na jinta k'o kakitzijoj wi y xtaqan k'u che cha' kaya' uwa ri ralko ali.

6

Ri Jesús kopon pa ri tinamit Nazaret

(Mt. 13:53-58; Lc. 4:16-30)

1 Ri Jesús xel b'i chirij y xopon pa rutinamit. Ek'u rutijo'n xeterej b'i chirij. **2** Echiri' xopon ri q'ij re uxlanib'al, xujeq kak'utun chupa ri sinagoga. Yey uk'iyal winaq xkito y lik xkam kanima' che, jek'uwa' kakib'i'ij:

—¿Pa xu'maja wi wa'chi ronoje taq wa'? ¿Sa' chi na'oj wa ya'tal che, yej su'anik ku'an taq wa milagros? ³ ¿Na e ta neb'a jun achi carpintero; ralab' ri María y katzixel ri Jacobo, ri José, ri Judas y ri Simón? ¿Na ejeqel ta neb'a ri ranab' wara chiqaxo'l? —kecha!. Ewi lik e k'i tzel xkita ri xub'i'ij y xkijeq kakik'aq b'i uq'ij.

⁴ Ek'u ri Jesús xub'i'ij chike:

—Chupa ronoje luwar kayak uq'ij juna q'alajisanel. No'j chupa rutinamit, chikixo'l ri ratz-uchaq' y pa rocho, na kayak ta uq'ij —xcha chike. ⁵ Chupa k'u ri' rutinamit xa e keb' oxib' ri xuya ruq'ab' pakiwi' y xeb'ukunaj, no'j na utz taj xu'an juna chik milagro ⁶ ma ri tikawex na kakikoj taj china Rire. Ek'u ri Jesús lik xkam ranima' che wa'. Xik'ow k'u pa taq ri aldeas k'o chunaqaj ri tinamit e ri' kak'utunik.

Ri Jesús kuya b'i kichak ri kab'lajuj utaqo'n

(Mt. 10:5-15; Lc. 9:1-6)

⁷ Tek'uchiri', xeb'usik'ij ri kab'lajuj utijo'n, xeb'utaq b'i pa kakab' y xuya pakiq'ab' keb'ekesaj b'i itzelilaj uxbal'ixel. ⁸ Yey xeb'utaq che na jinta k'o kakik'am b'i re pa b'e; xew kakik'am b'i ri kich'ami'y. Na kakik'am tane b'i kiteb', kiwa o kimeyo chwi ri kipas. ⁹ Yey utz kakikoj b'i kixajab'; no'j na utz taj kakik'am b'i jumolaj chik kiq'u', xew ri kikojom. ¹⁰ Y xub'i'ij b'i chike:

«We kixk'ul pa juna ja, chixk'ola chirí'; k'ate kixel b'i echiri' kix'ek pa jun chik tinamit. ¹¹ No'j we chupa juna tinamit na kixk'ul taj y na kak'ul tane ri Utzilaj Tzij kitzijoj, chixelub'i chirí' yej chipupa' kan rulew k'o che ri iwaqan; wa' e

k'utub'al re na utz ta ki'anom ri ejeqel chiri'. Paqatzij wi kamb'i'ij chiwe: Chupa ruq'ijol ri q'atb'al tzij, más k'ax ri kape pakiwi rike chwa ri kape pakiwi ri e aj Sodoma y Gomorra»* xcha'.

¹² Xeb'el k'u b'i rutijo'n che utzijoxik chike ri tikawex puwi ri lik chirajawaxik kakitzelej kitzij chwach ri Dios. ¹³ Xeb'ekesaj b'i uk'iyal itzel uxlab'ixel yey xkikoj aceite pakiwi uk'iyal yewa'ib' y xekikunaj.

*Rukamik ri Juan Aj Ya'l Bautismo
(Mt. 14:1-12; Lc. 9:7-9)*

¹⁴ Ri rey Herodes xuta puwi ri chom uch'a'tib'exik ri Jesús, ma lik xeta'max rub'i' pa taq ronoje luwar. Ek'u ri Herodes xub'i'ij: «La' e ri Juan Aj Ya'l Bautismo xk'astaj lo chikixo'l ri ekaminaq; e uwari'che k'o uchuq'ab' che u'anik wa milagros» xcha'.

¹⁵ Yey e k'o jujun chik keb'i'n re: «Rire e Elías» y jujun chik keb'i'n re: «E juna q'alajisanel o laj junioq chike ri q'alajisanelab' re oyertan.»

¹⁶ Echiri' xuta wa' ri Herodes, xub'i'ij: «La' e ri Juan ri jun xintaq uq'atik rujolom, xk'astaj lo chikixo'l ri ekaminaq» xcha'.

¹⁷ Xub'i'ij wa' ma e rire ri xutaq uchapik ri Juan cha' kaya'i' pa karena y ke'yo'q pa cárcel. Xu'an wa' ri Herodes ma ri Juan xuch'a'b'ej upa ruma u'anom rixoqil che ri Herodías, yey wa' wi'xoq e rixoqil ri Felipe ruchaq' ri Herodes. ¹⁸ Jewa' ri xub'i'ij ri Juan che: «Lik na ub'e taj 'anom ixoqil la che ri rixoqil ri chaq' la» xcha'.

* **6:11** Gn. 19:24-29

19 Ruma k'u la', rixoq Herodías lik xutzukuj sa' ku'an che ri Juan. Lik xraj kukamisaj; pero na kuriq taj sa' u'anik ku'ano, **20** ma ri Herodes kuxi'iij ne rib' chwach ri Juan. Yey utaqom ne uchajixik cha' na jinta kuk'ulumaj, ma reta'am ri Juan e jun achi lik jusuk' y lik uya'om rib' puq'ab' ri Dios. Echiri' ri Herodes kuta ruk'utunik ri Juan, tob' na kumaj ta usuk', lik kacha uk'u'x che utayik.

21 Ewi xopon jun q'ij echiri' ri Herodes xuk'is ujunab' y xuya jun nimalaj wa'im chike taq raj wach e k'o ruk', kuk' ri e taqanelab' ke rusoldados y ri e aj Galilea lik k'o kiwach. **22** Xok k'u b'i ri ralit rixoq Herodías pa k'o wi ri Herodes kuk' konoje taq ri e k'o chwa ri mexa, y xujeq kaxajaw chikiwach. Wa' lik xuk'ul kik'u'x konoje ri e k'o chir! Ewi ri Herodes jewa' xub'i'ij che la'li:

«Chatz'onoj sa' ri kawaj, ma ri'in kanya chawe» xcha!. **23** Y xujikib'a' k'u uwach che:

«Ronoje ri katz'onoj, kanya chawe, tob' ne pa nik'aj che taq ri k'o panuq'ab'» xcha!.

24 Ewi rali xel b'i cha' ku'tz'onoj che lu'chu:

«¿Sa' nawi ri kantz'onoj?» xcha!.

«E chatz'onoj rujolom ri Juan Aj Ya'l Bautismo» xcha ruchu che.

25 Na jampatana k'u ri!, rali lik kanik xok b'i chwa ri rey Herodes y jewa' xub'i'ij che:

«Kuaj kaya la chwe wo'ora pa jun a plato rujolom ri Juan Aj Ya'l Bautismo» xcha che.

26 Ri rey lik xb'isonik ruma ri xtz'onoj che. Pero ruma k'u ri xujikib'a' uwach che rali chikiwach konoje ri e k'o ruk' pa wa'im, na xraj ta chik xujek' ruch'a'tem. **27** Ewi xutaqala' b'i jun soldado cha' ke'ek y kuk'am lo rujolom ri Juan. **28** Ri

soldado xe'ek pa ri cárcel y xuk'atzij rujolom ri Juan. Xuk'am lo pa jun plato y xuya k'u che rali, y rali xu'ya'a che ruchu.

²⁹ Echiri' xkita wa' rutijo'n ri Juan, xo'lkkik'ama rucuerpo y xe'kimuqu'.

Ri Jesús keb'utzuq wo'ob' mil achijab'
(Mt. 14:13-21; Lc. 9:10-17; Jn. 6:1-14)

³⁰ Echiri' rutaqo'n ri Jesús xetzelej lo che utzijoxik ri Utzilaj Tzij, xkimol kib' ruk' Rire y xkitzijoj che janipa ri xki'ano y xkik'utu. ³¹ Ek'u ri Jesús xub'i'ij chike:

—Chixpeta wuk' itukel, jo' cha' koje'uxlan k'enoq pa juna luwar pa na e jinta wi winaq —xcha'. Jela' xub'i'ij chike ma lik e k'i ri winaq, e k'o ri keb'ek y e k'o ri kek'unik yey rike na utz ta chi ne kewa'ik. ³² Xeb'ok k'u b'i ri Jesús kuk' rutijo'n kitukel chupa jun barco y xeb'ek pa jun luwar katz'intz'otik. ³³ Pero lik e k'i ri xeb'ilowik echiri' xeb'ek y xketa'maj uwach ri Jesús. Ewi uk'iyal winaq xeb'ek chaqan, wa' eb'elinaq lo pa taq ri tinamit. Nab'e k'u ri' xeb'opon chwa ri Jesús yey echiri' Rire xoponik, xkimol kib' ruk'.

³⁴ Echiri' xel lo ri Jesús pa ri barco, xrilo e k'o chi uk'iyal winaq chiri'. Lik k'ut xejuch' ka'n pa ranima', ma pacha' e b'exex na jinta chajinel ke. Ek'u ri Jesús xujeq kuya uk'iyal k'utunik chikiwach. ³⁵ Echiri' lik b'enaq q'ij chik, xeqib' lo rutijo'n ruk' y jewa' xkib'i'ij che:

—Qajawal, wa luwar oj k'o wi lik katz'intz'otik y b'enaq q'ij chik. ³⁶ Utz we ketaq b'i la ri winaq cha' keb'ek pa taq raldeas y pa taq ri luwar k'o lo

xa naqaj re ke'kiloq'o kiwa, ma ri wara na jinta k'o katijik —xecha'!

³⁷ No'j ri Jesús xuk'ul uwach:
—Cheb'itzuqu ri'ix —xcha chike.

Rike xkib'i'ij che:

—¿E kami ka'aj la ri' ke'qaloq'o kiwa konoje wa tikawex cha' keqatzuqu? ¡Ri rajil wa' e junam ruk' keb' ciento q'ij re chak! —xecha'!

³⁸ Ri Jesús xub'l'i'ij chike:
—¿Janipa chi pam k'o iwuk'? Jix ji'wilape' —xcha chike.

Echiri' xketa'maj, xkib'i'ij che:

—Xa wo'ob' chi pam y ka'ib' chi kar —xecha'.

³⁹ Ek'u ri Jesús xtaqan che ketz'uyi' konoje ri tikawex chimutza'j pa taq ri rax k'im. ⁴⁰ Xetz'uyi' k'u chimutza'j re jujun ciento y re nik'aj ciento.

⁴¹ Ek'u ri Jesús xuk'am ri wo'ob' pam ruk' ri ka'ib' kar, xtzu'n chikaj y xtioxin chwach ri Dios. Tek'uchiri', xuwech' upa ri pam y xuya chike rutijo'n cha' kakijach chike ri winaq. Y jela' xu'an ruk' ri keb' kar, xjachi' k'u ri' wa' chike konoje.

⁴² Konoje k'u ri winaq xewa'ik y xenoj chi utz.

⁴³ Tek'uchiri', xkimol ri ch'aqa'ta'q pam y kar, y ruk' wa' xnoj lo kab'lajuj chakach. ⁴⁴ Yey ri xewa'ik e lo wo'ob' mil chi achijab'.

*Ri Jesús kab'in chwi ri ya'
(Mt. 14:22-27; Jn. 6:15-21)*

⁴⁵ Tek'uchiri', ri Jesús xeb'utaq rutijo'n cha' keb'ok b'i chupa ri barco, kenab'ej b'i chwach y keq'ax k'a ch'aqa ya' che ri tinamit Betsaida, xaloq' Rire keb'uch'a'b'ej taq kan ruk'iyal winaq.

⁴⁶ Echiri' eb'uch'a'b'em chi kanoq, xel b'i chwa ri juyub' cha' ku'ana orar.

⁴⁷ Echiri' xok raq'ab', ri barco k'o chi punik'ajal ri mar, yej ri Jesús utukel kanajinaq kan chu'lew.
⁴⁸ Anim tan k'u ri', ri Jesús xeril pan rutijo'n lik ruk' k'ax ketajin che ub'inisaxik ri barco rumá runimal tew petinaq chikiwach. Ek'u ri Jesús xe'ek kuk'; e ri' kab'in chwi ri mar, ya e ri' kik'ow chikiwach.

⁴⁹ Pero rutijo'n echiri' xkilo kab'in chwi ri ya', xkich'ob'o e juná espíritu. Xkijeq k'u ri' kesik'inik, ⁵⁰ ma konoje xkilo y lik xkixi'ij kib' che. Tek'uchiri', ri Jesús xeb'uch'a'b'ej, jewa' xub'i'ij chike:

—Chinimarisaj ik'u'x, ma ri'in in Jesús; mixi'ij k'u iwib' —xcha chike.

⁵¹ Xok k'u b'i ri Jesús kuk' chupa ri barco; ek'u runimal tew xtani'ik. Rutijo'n lik xkam kanima' che, ⁵² ma k'amaja' ne kakimaj usuk' ri xu'an ri Jesús echiri' xu'an k'i che ri pam, ma e pacha' ch'uqatal ri kina'oj.

*Ri Jesús keb'ukunaj ri yewa'ib' e k'o Genesaret
(Mt. 14:34-36)*

⁵³ Ek'uchiri' xkiq'axuj ri ya', xeb'opon che ri luwar re Genesaret y xkixim ri barco chuchi' ri ya'. ⁵⁴ Echiri' xeb'el lo chupa ri barco, na jampatana ri winaq xketa'maj uwach ri Jesús.

⁵⁵ Xeb'ek k'u ri' re kakitzijoj puwi ri Jesús pa taq ronoje ri luwar re Genesaret. Yey ri winaq re ronoje taq luwar xkijeq kekik'am taq lo yewa'ib' e telem lo chwa ch'at k'a pa ri luwar pa kitom k'o wi ri Jesús. ⁵⁶ Y tob' pa taq chawi xok wi ri Jesús, pa taq tinamit, pa taq aldeas o pa taq juyub', e k'o

ri kekiya ri yewa'ib' chuchi' taq ri b'e y kakikoj k'u kib' chwach ri Jesús cha' kuya luwar chike tob' ne xew ruchi' ruq'u' kakichapo. Konoje k'u ri keb'anaw wa', kekunutajik.

7

Ri kach'ulan re ri tikawex
(Mt. 15:1-20)

¹ Ek'u ri fariseos kuk' jujun chike raj k'utunel re ri tzijpixab' e petinaq Jerusalem, xkimol kib' ruk' ri Jesús. ² Wa' wa'chijab' xkijeq kekich'a'tib'ej jujun chike rutijo'n ri Jesús ma xekilo kewa'ik yey na kich'ajom ta ri kiq'ab'. Y wa' na e ta kik'utu'n kan ri kati'-kimam. ³ Ma ri fariseos y ri nik'aj chik aj judi'ab' e lik kitaqem ri kik'utu'n kan ri kati'-kimam. Rike na kewa' taj we na kakich'aj ta nab'e ri kiq'ab' chi utz. ⁴ Y echiri' ketzelej lo pa k'ayb'al, na jintu k'o kakitijo we na kakich'aj ta nab'e ri kiq'ab', jela' pacha' ri k'utum kan chike. Yey kitaqem uk'iyal k'utunik xa kimajom kan chikij kati'-kimam, jela' pacha' ru'anik kach'aj taq upa ri tijb'al ya', ri xaro, rub'itaq sa'ch re ch'ich' y rujosq'ixik ri ch'at re warab'al. ⁵ Ruma k'u la' ri fariseos y raj k'utunel re ri tzijpixab' xkitz'onoj che ri Jesús:

—¿Su'b'e ri tijo'n la na kitaqem ta ri kik'utu'n kan ri qati'-qamam? Ma rike kewa'ik tob' e la' na kich'ajom ta ri kiq'ab' —xecha'!

⁶ Ek'u ri Jesús xuk'ul uwach:

—¡Xa keb' palaj alaq! Lik qatzij ri tz'ib'ital kan ruma ri q'alajisanel Isaías paw'i alaq. Ma jewa' xutz'ib'aj kanoq:

Wa' wa tinamit xa ruk' ruwake' kakiyak nuq'ij,

no'j ri kanima' lik naj k'o wi chwe.

⁷ Na jinta k'ana kutiqoj kakiloq'oj nuq'ij,
ma ri k'utunik kaki'ano xa taqanik ke achijab!. *Is.*
29:13

^{23.13} 8 Ek'u ralaq e ya'om kan alaq Rutzij Upixab' ri
Dios y e lik kok alaq il che u'anik ri kik'utu'n kan
ri tikawex, pacha' ka'an alaq ruk' rujosq'ixik ri
tijb'al ya' y ruch'ajik upa ri xaro; yej k'o ne jujun
chik pacha' taq wa' ka'an alaq xa majom kan alaq
—xcha'. ⁹ Je tanchi k'u wa' xub'i'ij chike:

—Ralaq 'anom alaq che Rutzij Upixab' ri Dios pacha' na jinta uchak, ruma e lik katajin alaq che u'anik ri kik'utu'n kan ri tikawex. ¹⁰ Ma ri Moisés jewa' utz'ib'am kan ojertan:

Chaloq'oj kiq'ij rachu-aqaw yey

Ex. 20:12

We k'o junq' keb'uyaj ruchu-uqaw ruk' itzel
ch'a'tem, ri' lik taqal che kakamisaxik **Ex.**
21:17

xcha ri Moisés.

¹¹ »No'lj ralaq kab'i'ij alaq: “Utz we jun achi xew kub'i'ij chike ruchu-uqaw: Na utz taj kanto' alaq, ma ri to'b'al kajawax che alaq, nub'i'tisim chik re nuqasa'n chwach ri Dios.” ¹² Yey chiwach ralaq, china ri kab'i'n re wa', na chirajawaxik ta chi che keb'uto' ruchu-uqaw. ¹³ Jek'uri'la' 'anom alaq che Rutzij Upixab' ri Dios pacha' na jinta uchak, rumataq ri no'jib'al petinaq lo chike ri chu'qaw alaq. Yey taqem alaq uk'iyal k'utunik pacha' taq wa'—xcha'.

¹⁴ Tek'uchiri', ri Jesúx xeb'usik'ij konoje ruk'iyal tikawex y jewa' xub'i'ij chike:

—Lik tanape onoje alaq y lik maja alaq usuk' wa': ¹⁵ Ri kach'ulan ri ranima' ri tikawex na e ta ri kutij b'i, ma e ri kel lo pa ranima', e wa' ri kach'ulan re. ¹⁶ China k'u ri k'o utanib'al che utayik, jchuta k'u ri!! —xcha chike.

¹⁷ Ek'u ri Jesús xeb'uya kan ruk'iyal tikawex y xok b'i che jun ja. Tek'uchiri' rutijo'n xki'an tz'onob'al che puwi wa k'amb'al na'oj. ¹⁸ Ewi rire xub'i'ij chike:

—¿Ix neb'a jun ri'ix chike ri na jinta kina'oj puwi wa'? ¿Na kimaj ta neb'a usuk' e ri kach'ulan ri ranima' ri tikawex na e ta ri kutij b'i? ¹⁹ Ma e janipa ri kutij b'i, ri' na kok ta chupa ri ranima'; xa chupa rupa ke'ek wi. Tek'uchiri', ku'pamaj b'i —xcha'. Ruk' wa' ri Jesús xraj xub'i'ij e ronoje taq ri re katijik, lik utz. ²⁰ Je tanchi wa' xub'i'ij chike:

—E ri kel lo pa ranima' ri tikawex, e wa' ri kach'ulan re. ²¹ Ma pa ranima' ri tikawex kel wi lo taq ritzel na'oj, ri makunik chirij ri k'ulanikil, ri karetz'ab'ej uwa uq'ij ruk' jun chik na uk'ulel taj, ri kamisanik, ²² ri eleq', ri rayinik re puaq, ri retzelal k'u'xaj, ri sokoso'nik; ri rayib'al re ri ti'jil, ri k'ax k'u'xaj chirij jun chik, ri itzel ch'a'tem chirij junq, ri ku'an nim chirib'il rib', ri na kuch'ob' tana sa' ri ku'ano. ²³ Ronoje taq wa' wa itzel uwach, chupa ri ranima' ri tikawex kel wuloq y e kach'ulan re rub'inik —xcha'!

Ri kub'ulib'al uk'u'x jun ixoq na kuk'il ta ri aj judi'ab'

(Mt. 15:21-28)

²⁴ Xel b'i ri Jesús chirij y xopon pa taq ri luwar re Tiro y re Sidón. Xok k'u chuchi' jun ja. Na xraj taj k'o keta'man re we Rire k'o chirij; na ruk' ta

k'u ri', xketa'maj ri winaq. ²⁵ K'o k'u jun ixoq, e ri ralit k'o puq'ab' jun itzel uxlab'ixel. Xew xuto k'o ri Jesús chirí', xk'unik y xuk'aq rib' xe'raqan uq'ab' ri Jesús. ²⁶ Ek'u rixoq na kuk'il ta ri aj judi'ab' yey alaxel pa ri luwar re Sirofenicia. Xelaj k'u che cha' karesaj b'i ri itzel uxlab'ixel che ri ralit.

²⁷ Ek'u ri Jesús xub'i'ij che:

—Chirajawaxik na nab'e kewa'ik y kenoj ri e ralk'o'al ri rajaw ja, ma na usuk' taj we junoj kumaj ri kiwa ri ralk'o'al y kuk'aq b'i chikiwa ri tz'i' —xcha che.

²⁸ Rixoq xuk'ul uwach:

—Qatzij, Qajawal, pero ¿na kewa' ta neb'a ri tz'i' ruk' ruk'aj kiwa rak'alab' katzaq chuxel' ri mexa? —xcha'.

²⁹ Ri Jesús xub'i'ij che:

—Ruma wa xab'i'ij, kanya chawe ri xatz'onoj. Jat k'u wo'ora ma ri itzel uxlab'ixel elinaq chub'i che rawalit —xcha'.

³⁰ Ek'uchiri' xopon rixoq chirocho, xu'riqa ri ralit kotz'ol chwa uwarab'al yey elinaq chub'i ri itzel uxlab'ixel che.

Ri Jesús kukunaj jun achi t'o'k y kach'iqch'otik

³¹ Ek'uchiri', xel tanchi ub'i ri Jesús che taq ri luwar re Tiro y xik'ow pa ri tinamit Sidón. Xopon k'u chuchi' ri mar re Galilea y xe'ela pa taq ri luwar re Decápolis. ³² Chiri' xkik'am lo chwach ri Jesús jun achi t'o'k y kach'iqch'otik, yey ri ek'amayom loq xeb'elaj che cha' kuya ruq'ab' puwi'.

³³ Ek'u ri Jesús xresaj b'i rachi chikixo'l ri winaq. Tek'uchiri' xuju' ruwi taq uq'ab' puxikin rachi y xukoj jub'iq' uk'axaj tza'm ri raq'. ³⁴ Xtzu'n

chikaj, xuk'is uk'u'x y jek'uwa' xub'i'ij che rachi: «*Efatal!*» (Wa' pa ri ch'a'tem arameo ke'elawi “chat-jaqatajoq”.) ³⁵ Na jampatana k'u ri', rachi xjaqataj ruxikin, xkiritaj ri raq' y xujeqo kach'a't chi utz.

³⁶ Ek'u ri Jesús lik xeb'upixab'aj ri winaq cha' na jinta k'ana k'o kakitzijo wi, no'j ri winaq tob' ne kepixab'axik, más ne xeb'ek che utzijoxik. ³⁷ Lik k'u kakam kanima' ri winaq che y jewa' kakib'i'ij: «Ronoje ri ku'ano lik utz, ma ri e t'o'k ku'an chike ketanik yej ri e me't ku'an chike kech'awik.»

8

*Ri Jesús keb'utzuq kajib' mil tikawex
(Mt. 15:32-39)*

¹ Chupa taq la' la q'ij xkimol kib' uk'iyal tikawex. Yruma na jinta kiwa re kakitijo, ri Jesús xeb'usik'ij rutijo'n y xub'i'ij chike:

² —Lik kajuch' ka'n nuk'u'x chike wa tikawex ma e urox q'ij wa' e k'o wuk' y na jinta chi kiwa. ³ Yey we e la' keb'enutaq b'i chikochó y na jinta k'o kitijom, ri' keb'e'q'ochq'ob' pa b'e, ma e k'o jujun chike lik naj e petinaq wi —xcha'!

⁴ Rutijo'n xkib'i'ij che:

—Pero, ¿pa kariqitaj wi wa re ketzuq wa uk'iyal tikawex? Ma chupa wa luwar na jinta ne k'o e jeqelik —xecha'!

⁵ Ri Jesús xutz'onoj k'u chike:

—¿Janipa chi pam k'o iwuk'? —xcha chike.
—Wuqub' —xecha rike.

⁶ Ewi ri Jesús xtaqan che ketz'uyi' ri tikawex chu'lew. Xuk'am k'u ri wuqub' pam y xtioxin chwach ri Dios. Tek'uchiri', xuwech' upa y

xuya chike rutijo'n cha' kakijach chike ruk'iyal tikawex; y rike e xki'ano. ⁷ Yey kuk'a'am ne jujun raltaq ko kar. Ek'u ri Jesús xtioxin chwach ri Dios puwi wa' y xtaqan k'u che kajachi' chike ri winaq.

⁸ Xewa' k'ut y lik xenoj chi utz. Tek'uchiri', xmol ri ch'aqa'ta'q kiqax y ruk' wa' xnoj wuqub' chakach. ⁹ Ri xewa'ik, laj e juna kajib' mil tikawex.

Ek'u ri Jesús xeb'uch'a'b'ej kanoq, ¹⁰ xok k'u b'i chupa ri barco kuk' rutijo'n y xeb'ek pa taq ri luwar re Dalmanuta.

Ri fariseos kakitz'onoj juna k'utub'al re ruchuq'ab' ri Jesús

(Mt. 16:1-4; Lc. 12:54-56)

¹¹ K'o jun q'ij ri fariseos xeb'opon ruk' ri Jesús y xkijevo e la' xa pa ch'a'tem kakichap pa ch'a'oj. Xkitz'onoj k'u che ku'an juna k'utub'al re chila' chikaj chikiwach cha' kaq'alajinik we Rire taqom lo rumá ri Dios; wa' xki'ano xa re k'amb'al upa.

¹² Ek'u ri Jesús lik xuk'is uk'u'x y xub'l'i'ij chike:
«¿Su'b'e ri tikawex re waq'ij ora e kakitz'onoj kan'an juna k'utub'al cha' kaq'alajinik we in-taqom lo rumá ri Dios? Paqatzij wi kamb'l'i'ij chiwe: Na jinta juna k'utub'al kaya'taj chike» xcha!. ¹³ Ewi xeb'uya kanoq, xok tanchi ub'i chupa ri barco y xq'ax ch'aqa ya'.

Ri kik'utunik ri fariseos

(Mt. 16:5-12)

¹⁴ Ek'u rutijo'n ri Jesús xik'ow chikik'u'x kakik'am b'i pam y xa jun chi pam k'o kuk' chupa la barco. ¹⁵ Ewi ri Jesús xeb'upixab'aj, jewa' xub'l'i'ij chike: «Lik chichajij iwib' chwa ri

“levadura”* ke ri fariseos y chwa ri “levadura” re ri Herodes» xcha’!

¹⁶ Rutijo'n xkib'i'ij k'u chikiwach: «Kub'i'ij wa' ma reta'am na jinta pam xqak'am loq» xecha’.

¹⁷ Ri Jesús xreta'maj sa' la kakich'a'tib'ej chikiwach y xub'i'ij k'u chike:

—¿Su'b'e kich'a'tib'ej chiwach puwi ri na xik'am ta lo pam? ¿K'amaja' neb'a kimaj usuk'? ¿Lik kami k'a ch'uqutal rina'oj? ¹⁸ K'o wa' k'u iwach yey e pacha' na kixtzu'n taj. K'o wa' k'u ixikin yey e pacha' na kixtan taj. ¿Lik neb'a na kak'un ta chik'u'x ¹⁹ echiri' xinjach ri wo'ob' pam chike ri wo'ob' mil tikawex? ¿Janipa k'u chakach xinojisaj ruk' ri kiqax? —xcha’!

Rutijo'n xkik'ul uwach:

—Kab'lajuj chakach —xecha’.

²⁰ Xutz'onoj tanchi chike:

—Yey echiri' xinjach ri wuqub' pam chike ri kajib' mil tikawex, ¿janipa lo chakach xinojisaj ruk' ri kiqax? —xcha’!

Rike xkik'ul uwach:

—Wuqub' chakach —xecha’.

²¹ Jek'uwa' xuk'isb'ej kuk':

—¿Su'b'e k'u ri' k'amaja' k'ana kimaj usuk'? —xcha chike.

Ri Jesús kukunaj jun potz' pa ri tinamit Betsaida

²² Tek'uchiri', xeb'opon pa ri tinamit Betsaida. Taq ri winaq xkik'am lo jun potz' chwa ri Jesús y xeb'elaj k'u che cha' kukunaj. ²³ Ek'u ri Jesús xuchap ruq'ab' ri potz', xresaj b'i chupa ri tinamit

* ^{8:15} “Levadura”: Jela' pacha' ri levadura kusipowirisaj upa ri pam; jek'ula' ri kina'oj ri fariseos y ri Herodes, na jampatana kuyoj ri kina'oj ri winaq.

y xchub'an che taq ruwach. Tek'uchiri', xuya ruq'ab' puwi' y xutz'onoj che we karil k'enoq.

²⁴ Ri potz' xtzu'n pana chwach y xub'i'ij:

—Keb'enuwil rachijab' pacha' chi e che' keb'inik —xcha'!

²⁵ Ri Jesús xuya tanchi ruq'ab' puwi ruwach ri potz'. Jek'ula' ri potz' xkunutajik y utz xtzu'nik. Xtzu'n k'u pana naj y xril ronoje chi utz.

²⁶ Tek'uchiri' ri Jesús xutaq b'i chirocho y jefa' xub'i'ij che:

—Matok b'i pa ri tinamit y matzijoj ne k'ana che junioq e ri'in xatinkunaj —xcha che.

Ri Pedro kuq'alajisaj ri Jesús e ri Cristo

(Mt. 16:13-20; Lc. 9:18-21)

²⁷ Ri Jesús kuk' rutijo'n xeb'ek pa taq ri aldeas re ri tinamit Cesarea re Filipo.† Yey chupa k'u ri b'e, ri Jesús xutz'onoj chike rutijo'n:

—Chikiwa ri winaq, ¿in china nawi ri'in? —xcha'.

²⁸ Rike xkik'ul uwach che:

—K'o keb'i'n re, lal ri Juan Aj Ya'l Bautismo; jujun chik kakib'i'ij lal ri Elías; y jujun chik, lal junioq chike taq ri q'alajisanelab' re ojertan —xecha'.

²⁹ Tek'uchiri', xutz'onoj chike:

—Yey chiwach ri'ix, ¿in china ri'in? —xcha'.

Ri Pedro xuk'ul uwach:

—Rilal lal ri Cristo, Rucha'o'n lo ri Dios —xcha'.

³⁰ Ewi ri Jesús xeb'utaq che na kakitzijoj ta che junioq china Rire.

† **8:27** K'o keb' tinamit Cesarea kib'i'. Wa jun e ri k'o chwa ri juyub' Hermón pa xtaqan wi ri Felipe, ruk'ajol ri Herodes.

*Ri Jesús kach'a't puwi rukamik y ruk'astajib'al
(Mt. 16:21-28; Lc. 9:22-27)*

³¹ Xujeq k'u ub'i'xikil chike:

«Lik chirajawaxik che Ralaxel Chikixo'l Tikawex kutij na ri k'ax y kak'aq b'i uq'ij kuma ri nimaq winaq re ri tinamit, ri nimaq e aj chakunel pa Rocho Dios y raj k'utunel re ri tzijpixab'. Tek'uchiri', kakamisaxik; no'j churox q'ij kak'astaj loq» xcha'.

³² Wa' xuq'alajisaj chi utz chike.

Ek'u ri Pedro xresaj b'i ri Jesús chikixo'l y xuch'a'b'ej upa rumá ri xub'i'ij. ³³ No'j ri Jesús xutzu' lo kiwach rutijo'n y xuch'a'b'ej k'u upa ri Pedro, jewa' xub'i'ij che:

—¡Chatel chinuwach, Satanás! Ma ri'at na e ta kach'ob' puwi ri uch'ob'om lo ri Dios, xew e kach'ob' jela' pacha' ri kakich'ob' ri winaq —xcha che.

Ri chirajawaxik chike ri kakaj keterej chirij ri Jesús

(Mt. 16:24-28; Lc. 9:23-27)

³⁴ Ek'uchiri', xeb'usik'ij ri winaq y rutijo'n, y jek'uwa' xub'i'ij chike:

«We k'o junq karaj katerej lo chwij, lik chirajawaxik che mu'an xew ri karaj rire, e chukuyu ri k'ax kape puwi' rumá ukojom ri nub'i' yey tereja lo chwij. ³⁵ Ma china ri na kuya ta ranima' ruk'aslem, ri' e kujam ri chomilaj k'aslema chwach ri Dios; no'j ri kuya ranima' ruk'aslem wuma ri'in y rumá ri Utzilaj Tzij, ri' e kuriq ri chomilaj uk'aslema chwach ri Dios. ³⁶ Ma ¿sa' k'u kutiqoj ri' che ri tikawex we ku'an rajaw ronoje ruwachulew yey kusach k'u uwach ruk'aslema?

37 ¿O k'o nawi rajil kutoj rachi chwa ruk'aslema
cha' na kujam taj? ¡Na jintaj!

38 »Mixk'ix k'u chwe ri'in y che ri nuch'a'tem
chikiwach raj makib' re waq'iij ora, ri na jusuk' ta
ri kanima' chwach ri Dios. Ma ri ka'anaw wa', ri
in Alaxel Chikixo'l Tikawex kink'ix che rire echiri'
kink'un lo ruk' runimal uchomalil ri Nuqaw y kuk'
taq ri santowilaj ángeles» xcha'.

9

1 Tek'uchiri', xub'i'ij chike:

—Paqatzij wi kamb'i'ij chiwe: E k'o jujun chike
wa e k'o wara, na kekam tana we na xkil tub'i
ruk'unib'al rutaqanik ri Dios ruk' unimal chuq'ab'
—xcha'.

Rijalk'atajib'al uwach ri Jesús

(Mt. 17:1-13; Lc. 9:28-36)

2 Waqib' q'ij k'u ub'i'xikil ri' wa', echiri' ri Jesús
xeb'ucha' ri Pedro, ri Jacobo y ri Juan y xeb'uk'am
b'i kitukel chwa jun nimalaj juyub!. Chila' k'ut
xjalk'atitaj uwach ri Jesús chikiwach. **3** Ruq'u' lik
kawolq'inik, xu'an lik saq pacha' ri nieve;* rusaqil
xilitajik na jinta k'o ka'anaw re che ruwachulew.
4 Xaqik'ate't k'ut chikiwach xewinaqir ri Elías y ri
Moisés, q'alajisanelab' re ojertan; e ri' kech'a't ruk'
ri Jesús.

5 Ek'u ri Pedro xub'i'ij che ri Jesús:

—Qajawal, lik utz xya'taj chiqe ri'oj oj k'o wara.
Qa'ana oxib' rancho:† jun e la, jun re ri Moisés y
jun re ri Elías —xcha'. **6** Ri Pedro xub'i'ij wa' ruma

* **9:3** Ri nieve jela' rusaqil pacha' katzu'n ri saqb'ach. † **9:5**
Ruchak wa' wa rancho xraj ku'an ri Pedro e re kakiloq'nimaj kiq'iij
ri keb' q'alajisanelab' y ri Jesús.

na kuna' taj sa' ri kub'i'ij, ma rire kuk' ri keb' chik rachb'i'il lik kixi'im kib'.

⁷ Ek'uchiri', xqaj lo jun sutz' y xu'an mu'j pakiwi'. Chupa k'u ri' ri sutz' xkita ruql ri Dios, jewa' xub'i'ij:

«E Nuk'ajol wa' ri lik k'ax kanno'o;
e chita utzij Rire»
xcha'.

⁸ K'ate k'u xkilo, xew chi ri Jesús k'o kuk'.

⁹ Echiri' xeqaj lo chwa ri juyub', ri Jesús xeb'utaq che na kakitzijoj ta k'ana che junq janipa ri xkilo; k'ate kakitzijoj echiri' Ralaxel Chikixo'l Tikawex k'astajinaq chi lo chikixo'l ri ekaminaq. ¹⁰ Ek'u rike lik xkik'ol pa kanima' ri xb'i'x chike y xki-jeq kakitz'onob'ej chikiwach puwi sa' ke'elawi ri k'astajib'al lo re Ralaxel Chikixo'l Tikawex.

¹¹ Ek'uchiri', xkitz'onoj che ri Jesús:

—¿Su'b'e raj k'utunel re ri tzijpixab' kakib'i'ij lik chirajawaxik nab'e na kak'un ri Elías chwach pan ruk'unib'al Ralaxel Chikixo'l Tikawex? —xecha'.

¹² Ek'u ri Jesús xuk'ul uwach:

—Qatzij, lik chirajawaxik nab'e na kak'un ri Elías y kuyib'a' pan ronoje chwach ruk'unib'al Ralaxel Chikixo'l Tikawex. Pero ¿sa' kich'ob' ri'ix puwi ri tz'ib'ital kan chupa Rutzij Upixab' ri Dios? Ma kub'i'ij lik chirajawaxik na, Ralaxel Chikixo'l Tikawex kutij k'ax y na jinta uq'ij ka'anik. ¹³ No'j k'u ri'in kanq'alajisaj wa' chiwe: Ri Elías ya xk'unik yey ri winaq xki'an che janipa ri xkaj rike, jela' pacha' ri tz'ib'ital kan puwi rire —xcha'.

*Ri Jesús kukunaj jun ala k'o puq'ab' jun itzel uxlab'ixel
(Mt. 17:14-21; Lc. 9:37-43)*

14 Echiri' xeb'opon pa e k'o wi kan ri jujun chik utijo'n, xkilo e k'o uk'iyal winaq kisutum kij yej raj k'utunel re ri tzijpixab' kekichapala' che ch'a'oj. **15** Konoje k'u ri winaq lik xeki'kotik echiri' xkil ri Jesús. Keb'anik xe'kik'ulu' apanoq y xkiya rutzil uwach. **16** Xutz'onoj k'u Rire chike:

—¿Sa' puwi kachapala' wi ib' alaq kuk' rike? —xcha'.

17 K'o k'u jun chikixo'l ruk'iyal winaq jewa' xuk'ul uwach:

—Lal tijonel, nuk'amom lo ri nuk'ajol chiwach la, ma rire k'o puq'ab' jun itzel uxlاب'ixel u'anom me't che. **18** Xa tob' pa kuchap wi, kuk'aq pulew. Ek'uchiri', rala kujeq kapuluwan ruk'axaj, kaqich'ich' ruwi taq re' y kakanaj kan junchi chuk'uchik. Xintz'onoj k'u chike ri tijo'n la cha' kakesaj b'i ri itzel uxlاب'ixel, pero rike na xkich'ij ta resaxik b'i —xcha'.

19 Ek'u ri Jesús xuk'ul uwach, jewa' xub'i'ij chike:

—¡E ri ix tikawex re waq'ij ora, na kub'ul ta k'ana ik'u'x wuk'! ¿Janipa chi lo q'ij kajawaxik kink'oj! iwuk' cha' kakub'i' ik'u'x wuk'? ¿Janipa chi lo q'ij kixinkuyu e la' jela' i'anom? Chik'ama lo rala wara —xcha'.

20 Xkik'am k'u lo rala chwach. Ek'u ri itzel uxlاب'ixel echiri' xril uwach ri Jesús, lik ko xujab'aja' rala. Ek'u rala xtzaq pulew y xujeqo kub'alkatila' rib', kapuluwan ruk'axaj.

21 Ri Jesús xutz'onoj k'u che ruqaw rala:

—¿Jampa ujeqom lo wa' che? —xcha'.

Rachi xuk'ul uwach:

—Chuch'uti'nal upeteb'em loq. **22** Uk'iyal laj uk'aqom pa aq' y pa ya' re kamisaxik uwach. We

k'o ko paq'ab' la kato' la, k'utu ko ri k'axna'b'al
k'u'x la chiqe y chojto'o la —xcha'.

23 Ri Jesús xuk'ul uwach:

—¿Su'b'e kab'i'ij la chwe we k'o panuq'ab'
kan'an wa'? Ma we k'o junoq lik kub'ul uk'u'x
wuk', ronoje kel pana ruk' —xcha'.

24 Ek'u ruqaw rala na jampatana ko xch'awik,
jewa' xub'i'ij:

—Kub'ul nuk'u'x uk' la, xew chinto'o ko la cha'
kanimar ri kub'ulib'al nuk'u'x —xcha'.

25 Ek'u ri Jesús echiri' xrilo katajin kimolotajik
ruk'iyal winaq, xtaqan puwi ri itzelilaj uxlاب'ixel,
jewa' xub'i'ij che:

—Itzelilaj uxlاب'ixel, ri a'anom me't y t'o'k che
wa'la, ri'in katintaqo: Jat, chatelub'i y mat-tzelej
chi lo k'ana ruk' —xcha che.

26 Ewi ri itzel uxlاب'ixel xsik'inik y lik ko xu-
jab'aja' rala; tek'uchiri', xel b'i. Ek'u rala xkanaj
kanoq pacha' kaminaq chik. Ruma ri', lik e k'i ri
xeb'i'n re: «Ya xkamik» xecha'.

27 Pero ri Jesús xuchap ruq'ab', xuyako; y rala
xtak'i'ik.

28 Ek'uchiri', xok b'i ri Jesús chuchi' jun ja.
Ek'u rutijo'n xech'a't ruk' xa kitukel chik, jewa'
xkitz'onoj che:

—¿Su'b'e ri'ojoj na xqach'ij tub'i resaxik wa' wa
itzel uxlاب'ixel? —xecha'.

29 Ri Jesús xuk'ul uwach:

—E taq wa' wa juch'ob' itzel uxlاب'ixel, xew utz
keb'esax b'i ruk' oración y ayuno —xcha'.

*Ri Jesús kach'a't tanchi puwi rukamik
(Mt. 17:22-23; Lc. 9:43-45)*

30 Echiri' xeb'el b'i chirí', xeb'ik'ow pa taq ri luwar re Galilea. Pero ri Jesús na xraj taj k'o keta'man re, **31** ma kak'utun chikiwach rutijo'n. Jek'uwa' kub'i'ij chike:

«Ralaxel Chikixo'l Tikawex kaya'i' pakiq'ab' rachijab' y kakamisax kuma, no'j echiri' kaminaq chik, kak'astaj lo churox q'ij» xcha'!

32 Ek'u rutijo'n na xkimaj ta usuk' la kub'i'ij chike, yej kakixi'ij kib' kakitz'onoj che ri Jesús sa' ke'elawi wa'.

*China ri lik k'o uwach
(Mt. 18:1-5; Lc. 9:46-48)*

33 Xeb'opon k'u chupa ri tinamit Capernaúm y echiri' e k'o chi chuchi' jun ja, xutz'onoj chike rutijo'n:

—¿Sa' puwi kichapala' wi iwib' chiwach echiri' kixtajin lo chi b'e? —xcha chike.

34 Yey na jinta k'u junq' chike xch'awik; ma echiri' k'a ketajin lo chi b'e, e kakichapala' kib' chikiwach puwi' chinoq chike kaya'i' más uwach.

35 Ewi ri Jesús xtz'uyi'ik, xeb'usik'ij ri kab'lajuj utijo'n y xub'i'ij chike:

—We k'o junq' karaj e rire ri kak'oji' nab'e chikiwach konoje, ri' chirajawaxik che e kakanaj kan pa k'isb'al chike konoje y kuya rib' keb'unimaj —xcha chike.

36 Xuk'am k'u jun ralko k'o'm y xuya chikinik'ajal rike. Xuq'aluj k'ut y jewa' xub'i'ij chike:

37 —China ri kuk'ul chupa ri nub'i' junq' na jinta uwach pacha' wa ralko k'o'm, e junam ruk' in ri kinuk'ulu; yej china ri kak'uluw we ri'in, na

xew ta kinuk'ul ri'in, ma e kuk'ul ri Jun taqayom
lo we ri'in —xcha'!

*China ri na kach'ojin ta chiqij, ri' e quk'il
(Lc. 9:49-50)*

³⁸ Ek'u ri Juan xub'i'ij che ri Jesús:

—Qajawal, xqil jun achi keb'eresaj b'i itzel
uxlab'ixel chupa ri b'i' la ye yey rire na quk'il taj.
Ek'u ri'oj xqab'i'ij che mu'an chi wa'—xecha'.

³⁹ Ri Jesús xuk'ul uwach:

—We k'o ka'anaw wa', miq'atej, ma na jinta
junoq ku'an juna milagro chupa ri nub'i' ye yey pa
joq'otaj k'u ri' kach'a't lo chwij. ⁴⁰ Ma china ri na
kach'ojin ta chiqij, ri' e quk'il. ⁴¹ China ri kusipaj
juna tzima iya' chupa ri nub'i' rumá ix re ri Cristo,
paqatzij wi kamb'i'ij chiwe, ri' na kujam ta k'ana
ri rajil uk'axel.

*Ri q'atb'al tzij re ri Dios k'o pakiwi ri kakiminjun
chik pa mak*

(Mt. 18:6-9; Lc. 17:1-2)

⁴² »No'j china ri kumin pa mak junoq chike wa
ch'uti'q‡ kub'ul kik'u'x wuk', e ne más utz katza-
yab'ax b'i puqul juna nimalaj ka're ke'em y kak'aq
k'u b'i chupa ri mar.

⁴³ »We raq'ab' e katzaqisan awe pa mak,
chaq'ata b'i. Ma xa ne kuya tob' at t'um katopon
pa ri k'asle mal chila' chikaj, chwa ri k'o ukab'ichal
raq'ab' ye yey katk'aq b'i chi xib'alb'a' re tijb'al k'ax,
chupa ri aq' na jinta chi uchupik

⁴⁴ pa na kekam ta wi ramoloy
ketijow ke wa' wa winaq ekaminaq,

‡ **9:42** “Ch'uti'q”: Wa'e taq ri na jinta kichuq'ab', ri na jinta kiwach
o ri k'ak' xkikub'a' kik'u'x ruk' ri Jesús.

yey ri aq' na jinta chi uchupik.

Is. 66:24

⁴⁵ »Yey we rawaqan e katzaqisan awe pa mak, chaq'ata b'i. Ma xa ne kuya tob' at jetz' katopon pa ri k'aslemal chila' chikaj, chwa ri k'o ukab'ichal rawaqan yey katk'aq b'i chi xib'alb'a' re tijb'al k'ax, chupa ri aq' na jinta chi uchupik

⁴⁶ pa na kekam ta wi ramoloy

ketijow ke wa' wa winaq ekaminaq,

yey ri aq' na jinta chi uchupik.

Is. 66:24

⁴⁷ »Yey we rawach e katzaqisan awe pa mak, chawesaj b'i. Ma xa ne kuya ri xa jun rawach katok pa rutaqanik ri Dios, chwa ri k'o ukab'ichal rawach yey katk'aq b'i chi xib'alb'a' re tijb'al k'ax

⁴⁸ pa na kekam ta wi ramoloy

ketijow ke wa' wa winaq ekaminaq,

yey ri aq' na jinta chi uchupik.

Is. 66:24

⁴⁹ »Chirajawaxik k'ut konoje kak'am na kipa, pacha' keb'ik'owisax pa aq'. E pacha' ri ka'an ruk' ronoje qasa'n kaya'i' chwach ri Dios: kakowisax rumatratz'am.* ⁵⁰ E ratz'am lik kajawaxik, no'j we xsach rutzayul, ¿su'anik tanchi ka'an tza che? Chirajawaxik k'ut lik k'o kutiqoj rib'inik isilab'ik ri'l ix jela' pacha' ratz'am lik kuriq uchak.* K'ola k'u rutziil chomal chiwach chijujunal—xcha chike.

10

Ri Jesús kak'utun chwi ri jachb'al ib'

(Mt. 5:31; 19:1-12; Lc. 16:18)

¹ Ri Jesús xel b'i che ri tinamit Capernaúm y xe'ek pa taq ri luwar re Judea y che taq ri luwar k'o ch'aqa ya' che ri nimaya' Jordán. E taq k'u ri winaq

* **9:49** Lv. 2:13 * **9:50** Mt. 5:13; Lc. 14:34-35

xkimol kib' ruk', y Rire xujeq kak'utun chikiwach pacha' ri xex ku'an wi. ²Xeqib' k'u ri fariseos ruk' y xki'an jun tz'onob'al che xa re k'amb'al upa:

—¿Ya'tal nawi puq'ab' juna achi kuya b'i ruwujil re jachb'al ib' che ri rixoqil? —xecha'.

³ Ek'u ri Jesús xuk'ul uwach:

—¿Sa' kub'i'ij ri taqanik xu'an kan ri Moisés che alaq? —xcha'.

⁴ Rike xkib'i'ij:

—Ri Moisés xuya luwar che rachi kuya b'i ruwujil re jachb'al ib' che ri rixoqil y jek'ula' na rixoqil ta chik* —xecha'.

⁵ Ri Jesús xub'i'ij chike:

—Xutz'ib'aj ne kan ri' wa' wa jun taqanik ma e ruma lik ko ri anima' alaq. ⁶No'j Ruch'a'tem ri Dios kub'i'ij:

Che ri jeqeb'al lo ruwachulew echiri' ri Dios xeb'u'an ri tikawex,
chi achi chi ixoq xeb'u'ano.

Gn. 1:27

⁷ Y kub'i'ij:

Ruma k'u ri', rachi echiri' kak'uli'ik,
karesaj rib' chikij ruchu-uqaw
cha' kajeqi' ruk' ri rixoqil;

⁸ y kikab'ichal k'u ri' keb'u'ana
xa e jun chwach ri Dios

Gn. 2:24

kacha'. Jek'uri'la', na e ta chi ka'ib' ma xeb'u'ana
xa e jun. ⁹E uwari'che, ri xeb'ujunimaj ri Dios, na
ya'tal ta che ri tikawex kujach kipa —xcha'.

¹⁰ Ek'uchiri' e k'o chi chi'ja, rutijo'n xkitz'onoj
tanchi che puwi wa xutzijoj. ¹¹Ri Jesús xub'i'ij
chike:

* **10:4** Dt. 24:1

—E junoq kuya ruwujil re jachb'al ib' che ri rixoqil yey kak'uli' tanchi ruk' juna chik ixoq, ri' kamakun chwach ri Dios chirij ri nab'e rioxoql. ¹² Jek'ula' rixoq, we kuya ruwujil re jachb'al ib' che ri rachijil* yey kak'uli' tanchi ruk' juna chik achi, ri' jenela' kamakun chirij ri k'ulanikil — xcha'!

*Ri Jesús kuyak kiq'ij rak'alab'
(Mt. 19:13-15; Lc. 18:15-17)*

¹³ E k'o jujun raltaq ko ak'alab' xek'am lo chwach ri Jesús cha' kuya ruq'ab' pakiwi'. No'j rutijo'n xekiyaj ri ek'amayom lo ke.

¹⁴ Ri Jesús, echiri' xril wa', xpe royowal y jewa' xub'i'ij chike: «Chiya'a luwar chike ri raltaq ko ak'alab' chepetá na wuk'. Meb'iq'atej; ma ri kaki'an e jela' pacha' rike, ri' ku'an ke rutaqanik ri Dios. ¹⁵ Paqatzij wi kamb'i'ij chiwe: China ri na kuk'ul ta rutaqanik ri Dios jela' pacha' ku'an juna ralko k'o'm, ri' na kok ta chupa» xcha'. ¹⁶ Tek'uchiri', xeb'uq'aluj ri raltaq ko ak'alab', xuya ruq'ab' pakiwi' y xeb'u'an bendecir.

*Jun b'eyom kach'a't ruk' ri Jesús
(Mt. 19:16-30; Lc. 18:18-30)*

¹⁷ Echiri' katajin b'i relik ri Jesús re kumaj tanchi ub'i rub'e, kak'alalik xopon jun ruk', xuxukub'a' rib' chwach y xutz'onoj k'u che:

—Lal utzilaj tijonel, ¿sa' ri kan'ano cha' k'o nuk'aslemal na jinta utaqexik? —xcha'!

* ^{10:12} Chupa ri taqanik re ri Moisés, na ya'tal ta che juna ixoq kuya b'i ruwujil re jachb'al ib' che ri rachijil, pero chupa ri taqanik ke ri na e ta aj Israel, kaya' luwar chike rioxoqb' kaki'an wa'!

18 Ri Jesú斯 xuk'ul uwach:

—¿Su'b'e kab'i'ij la “utz” chwe? Ma xa jun ri lik utz k'olik, wa' e ri Dios. **19** Rilal eta'am chi la sa' taq Rutzij Upixab' ri Dios: “Matmakan chirij ri k'ulanikil. Matkamisanik. Mateleq'ik. Ma'an raq'ub'al chirij junoq. Mak'o ma'an xa ruk' sokoso'nik. Chaloq'oj kiq'ij rachu-aqaw”* —xcha che.

20 Rachi xuk'ul uwach:

—Lal tijonel, ronoje wa' nu'anom lo chwi nuch'uti'nal —xcha'.

21 Ewi ri Jesú斯 xutzu' uwach y lik xjuch' kan uk'u'x che. Xub'i'ij k'u che:

—Xa jun chi ri lik chirajawaxik wi ka'an la: Oj la, k'ayij la ronoje taq ri b'eyomalil la y jacha k'u la chike ri nib'a'ib'; jek'uri'la' k'o b'eyomalil la chila' chikaj. Tek'uchiri', peta la, terej lo la chwij y kuyu la ri k'ax kape pawi' la rumal lal nutijo'n —xcha che.

22 Ek'u rachi lik xuchap ranima' che ri xub'i'ij ri Jesú斯; lik kab'isonik xe'ek, ma rire lik rajawal b'eyom.

23 Tek'uchiri', ri Jesú斯 xeb'utzu' konoje y xub'i'ij chike rutijo'n:

—Ri e b'eyomab' lik k'ayew chike keb'ok chupa rutaqanik ri Dios —xcha'.

24 Rutijo'n ri Jesú斯 lik xkam kanima' che wa xub'i'ij. Rire xub'i'ij k'u chike:

—Ix walk'o'al, e janipa ri lik kikub'am kik'u'x ruk' ri kib'eyomalil, lik k'ayew chike keb'ok chupa rutaqanik ri Dios. **25** E ne más k'ayew kok juna

* **10:19** Éx. 20:12-16

b'eyom chupa rutaqanik ri Dios chwa ri kik'ow juna camello chupa rutel juna akuxa'—xcha'.

26 Rike lik xkam kanima' che wa' y xkib'i'ij k'u chikiwach: «We e ri', ¿china k'u ri' ri kakolob'etajik?»† xecha'.

27 Ek'u ri Jesús xutzu' kiwach, xub'i'ij chike:

—Ri tikawex na kakikolob'ej ta kib' kitukel ma wa' lik k'ayew chikiwach, no'j ri Dios ronoje ku'ano ma na jinta k'ayew chwach Rire —xcha'.

28 Ek'u ri Pedro xujeq ub'i'xikil che ri Jesús:

—Qajawal, e ri'oj qaya'om kan ronoje y oj teran chi'i'ij la —xcha'.

29 Ri Jesús xub'i'ij:

—Paqatzij wi kamb'i'ij chiwe: China ri uya'om kan rocho, eb'uya'om kan ri ratz-uchaq', ruchuuqaw, ri rixoqil, ri ralk'o'al o rulew, ruma ukojom ri nub'i' ri'in y ruma rutzijoxik ri Utzilaj Tzij, **30** ri' kuk'ul wara che ruwachulew chupa taq wa q'ij oj k'o wi, jun ciento ri rajil uk'axel ruma taq ri uya'om kanoq, tob' lik kutij k'ax ruma wa'. Yey chwach k'u apanoq kuk'ul na ri k'aslemal na jinta utaqexik. **31** Lik k'u e k'i chike ri lik k'o kiwach wo'ora, chwach apanoq na jinta chi kiwach; yey lik e k'i chike ri na jinta kiwach wo'ora, e lik kak'oji' kiwach chwach apanoq —xcha'.

*Ri Jesús kach'a't tanchi puwi rukamik
(Mt. 20:17-19; Lc. 18:31-34)*

† **10:26** Chikiwach raj judi'ab', we junooq k'o ub'eyomal e ruma utz u'anom chwach ri Dios. Kakich'ob' k'u rike, we k'ayew chike ri b'eyomab' keb'ok chupa rutaqanik ri Dios, más ne k'ayew ri' chike ri nib'a'ib'.

32 Ek'u ri' kimajom b'i ri b'e re kepaqi' Jerusalem, ye yey ri Jesús nab'e b'i chikiwach. Ek'u rutijo'n lik sachinaq kina'oj y ruk' xi'in ib' eteran chirij. Ek'uchiri', ri Jesús xeb'uk'am tanchi ub'i kitukel ri kab'lajuj utijo'n y xujeq ub'i'xikil chike sa' taq ri karik'owib'ej. **33** Jawa' xub'il'ij:

—Chitape': E wa' kojpaqi' Jerusalem, ye yey Ralaxel Chikixo'l Tikawex kaya' na pakiq'ab' ri nimaq e aj chakunel pa Rocho Dios y raj k'utunel re ri tzijpixab', cha' kakiq'at tzij puwi' re kamik y kakiya pakiq'ab' ri winaq na e ta aj judi'ab'. **34** Kach'amix k'u ri', kajich' upa, kachub'axik y kakamisaxik. No'j churox q'ij kak'astaj b'i chikixo'l ri ekaminaq —xcha'!

*Ri xkitz'onoj ri Jacobo y ri Juan che ri Jesús
(Mt. 20:20-28)*

35 Ek'u ri Jacobo y ri Juan, ri keb' uk'ajol ri Zebedeo, xeqib' ruk' ri Jesús y xkib'i'ij che:

—Qajawal, kaqaj ka'an ko la chiqe janipa wa kaqatz'onoj che'la —xecha'.

36 —¿Sa' ri kiwaj kan'an chiwe? —xcha ri Jesús chike.

37 Rike xkib'i'ij che:

—E kaqaj ri'oj kaya la chiqe chupa ri chomilaj taqanik la, jun chiqe katz'uyi' pawikiq'ab' la ye yey ri jun chik pa mox la —xecha'.

38 Ri Jesús xub'i'ij k'u chike:

—Ri'ix na iweta'am taj sa' la kitz'onoj. ¿Kich'ij neb'a ri'ix ri kinik'ow wi ri'in y ri k'ax kape panuwi'? —xcha'.

39 Rike xkib'i'ij:

—Kaqach'ijo —xecha'.

Ri Jesús xub'i'ij chike:

—Qatzij, ri'ix kich'ij na ri k'ax kinik'ow wi ri'in y
ri k'axk'ob'ik kape panuwi'. ⁴⁰ No'j k'u ri kixtz'uyi'
pa nuwikiq'ab' y pa numox, na in ta kinya'w re,
ma xew kaya'taj chike ri echa'tal chik cha' ku'ana
na ke —xcha'.

⁴¹ Ri lajuj chik tijo'n, echiri' xkita wa', lik xpe
koyowal chikij ri Jacobo y ri Juan. ⁴² Ek'u ri Jesús
xeb'usik'ij y xub'i'ij chike:

—Iweta'am ri'ix, ri ekojtalik e taqanelab' pakiwi
ri nimaq tinamit keb'u'ana pacha' e rajaw ronoje,
yey ri lik k'o kiwach kik'ow uwi' ri taqanik kaki'an
pakiwi ri eya'tal pakiq'ab'. ⁴³ No'j chixo'l ri'ix
na ub'e taj jela' ku'ano. Ma we k'o junq chiwe
ri'ix karaj ku'ana aj wach, e chuya'a rib' ku'an
nimanel iwe'ix. ⁴⁴ Yey e junq chiwe karaj ku'ana
nab'e chixo'lib'al, e chuya'a rib' ku'an nimanel ke
konoje. ⁴⁵ Ma Ralaxel Chikixo'l Tikawex na xk'un
taj re kanimaxik. Rire xk'unik re ko'l nimanoq y
re kolu'ya'a rib' pa kamik che kikolob'exik uk'iyal
tikawex —xcha'.

Ri Jesús kukunaj jun potz' Bartimeo rub'i'
(Mt. 20:29-34; Lc. 18:35-43)

⁴⁶ Ek'uchiri', ri Jesús kuk' rutijo'n xeb'ik'ow
chupa ri tinamit Jericó, y uk'iyal winaq xeterej b'i
chirij. Echiri' katajin b'i kelik chupa ri tinamit,
xeb'ik'ow pa tz'ul wi ri Bartimeo, wa' e jun potz'
uk'ajol ri Timeo. Rire e ri' kutz'onoj limoxna.
⁴⁷ Ek'uchiri' xuto e Jesús ri aj Nazaret ri katajin
rik'owik, xujeqo kasik'inik:

—¡Jesús, lal ri Ralk'o'al kan ri rey David, chin-
juch' ka'n ko che'la! —xcha'. ⁴⁸ Uk'iyal winaq

xkich'a'b'ej upa cha' na kasik'in ta chik, no'j rire más ne ko kasik'inik:

—¡Lal ri Ralk'o'al kan ri rey David, chinjuch'ka'n ko che'la! —kacha'!

⁴⁹ Ek'u ri Jesús xtak'i'ik y xutaq usik'ixik ri potz'. Ri xeb'e'sik'in re xkib'i'ij che:

—¡Chanimarisaj ak'u'x! ¡Chatyaktajoq! Ri Jesús katusik'ij —xecha'.

⁵⁰ Ri potz' xuk'aq kan ruq'u' uripom chirij, xyaktajik y xopon pa k'o wi ri Jesús.

⁵¹ Ri Jesús xub'i'ij k'u che:

—¿Sa' ri kawaj kan'an chawe? —xcha'.

Ri potz' xuk'ul uwach:

—Lal tijonel, kuaj kintzu'n tanchik —xcha'.

⁵² Ek'u ri Jesús xub'i'ij che:

—Jat chi utzil chomal, ma ruma ri kub'ulib'al ak'u'x wuk', at kunutajinaq chik —xcha'. Chupa k'u ri' la joq'otaj, ri potz' xtzu'nik y xterej b'i chirij ri Jesús.

11

Ri winaq kakiyak uq'ij ri Jesús echiri' kok Jerusalem

(Mt. 21:1-11; Lc. 19:28-40; Jn. 12:12-19)

¹ Ri Jesús kuk' rutijo'n xa naqaj chi e k'o lo che ri tinamit Jerusalem, ya e ri' keb'opon chwach ri juyub' Olivos pa taq raldeas Betfagé y Betania. Ek'uchiri', ri Jesús xeb'utaq b'i ka'ib' chike rutijo'n cha' kenab'ej apanoq, ² jewa' xub'i'ij chike:

—Jix pa raldea k'o pan chiqawach. Xew k'u kixoponik, ki'riqa jun q'apoj buru yuqulik. Wa'na jintu junq'ko joyom re. Chikira' y chik'ama loq. ³ We k'o k'u junq'kutz'onoj chiwe: “¿Su'chak

ki'an wa'?", chib'i'ij che: "Rawaj kajawax che ri Qajawal, yej k'ate kutaq tanchi uloq" —kixcha'!

⁴ Xeb'ek k'ut y xkiriq ri q'apoj buru yuqub'am pa b'e chunaqaj jun puerta. Ewi xkikir loq. ⁵ Jujun k'u chike ri e k'o chirij' xkitz'onoj:

—¿Sa' ri ki'ano? ¿Su'b'e kikir ri q'apoj buru? —xecha'.

⁶ Rike e xkib'i'ij janipa ri b'i'im b'i chike ruma ri Jesú; ewi xya' lo chike xkikir loq. ⁷ Xkik'am k'u lo ri q'apoj buru y xkirip ri kimanta* chirij. Ek'u ri Jesú xukoj b'i.

⁸ Uk'iyal winaq xkiwiq ri b'e pa kik'ow wi ri Jesú, xkilik' taq ri kimanta pa ri b'e; yej e k'o jujun chik xkiq'at raltaq ko uq'ab' che' y xkilem pa la b'e re yakb'al uq'ij. ⁹ Ri winaq e nab'ejinaq chwach kuk' ri eteran lo chirij xkijeqo lik kesik'inik, kakib'i'ij:

«¡Qayaka uq'ij!

¡Nim uq'ij ralaxik ri jun petinaq chupa rub'i' ri Dios Qajawxel!*

¹⁰ ¡Nim uwach uq'ij ri taqanik re ri qamam David kak'un loq!

¡Qayaka uq'ij ri Dios k'o chila' chikaj!»
kecha'.

¹¹ Xopon k'u ri Jesú Jerusalem y xok chupa ri Rocho Dios. Xa xril k'u ronoje sa' taq ri k'o chupa; pero ruma ya e ri' kok raq'ab', xe'ek Betania kuk' ri kab'lajuj utijo'n.

*Ri Jesú kuchaqisaj jun che' re higo
(Mt. 21:18-19)*

* **11:7** "Manta" e jun k'ul kakikoj ri aj Israel re ojertan, tob' achijab' o ixoqib', pacha' po't woka'j re karab'exik. * **11:9** Sal. 118:26

12 Chuka'm q'ij k'ut echiri' xeb'el b'i Betania, ri Jesús xpe numik che. **13** Y chinimanaj xril pana jun che' re higo lik k'o uxaq. Ewi xe'ek xe'rila' we k'o ujq'ob'alil kuriqo. Yey echiri' xopon ruk', na jinta k'o xuriq che, xew ruxaq k'olik, ma na uq'ijol taj k'o uwach ri higos. **14** Ewi ri Jesús xub'i'ij che ri che' re higo:

—Na jinta chi k'ana junq kutij jiq'ob'al chawé
—xcha!. Yey wa xub'i'ij, xkita rutijo'n.

*Ri Jesús keb'eresaj b'i raj k'ay chupa ri Rocho
Dios*
(Mt. 21:12-17; Lc. 19:45-48; Jn. 2:13-22)

15 Xeb'opon k'u Jerusalem y echiri' xok b'i ri Jesús chupa ri Rocho Dios, xujeq lo kesaxik konoje ri kek'ayinik y ri keloq'ow chupa. Yey xuxulk'atila' taq b'i ri mexa ke ri e aj jachal uwach puaq y taq ri xila ke ri e aj k'ay palomax. **16** Y na xuya ta luwar che junq k'o ruk'a'am kik'ow pa ri Rocho Dios xa re kuq'at ub'e. **17** Xujeq k'u kak'utun chikiwach, jawa' kub'i'ij:

«¿Na eta'am ta neb'a alaq ri tz'ib'ital kan chupa Ruch'a'atem ri Dios? Ma ri Dios kub'i'ij:

Che ri Wocho kab'i'xik:

“E luwar re oración

ke konoje taq ri tinamit che ruwachulew” *Is. 56:7*
kacha!. No'j ralaq, 'anom alaq che ri Wocho e jun luwar ke eleq'omab!»* xcha!.

18 Wa' xkita raj k'utunel re ri tzijpixab' y ri nimaq e aj chakunel pa Rocho Dios. Ruma k'u ri', kakitzukuj sa' u'anik kakikamisaj ma kakixi'ij kib'

* **11:17** Jer. 7:11

che rumá konoje ri winaq lik kakam kanima' che taq ruk'utunik.

¹⁹ Ek'uchiri' xok raq'ab', ri Jesús xel b'i chupa ri tinamit.

Ri che' re higo chaqijinaq chik

(Mt. 21:19-22)

²⁰ Chuka'm q'ij anim echiri' xeb'ik'ow ri Jesús kuk' rutijo'n pa k'o wi ri che' re higo, xkilo chaqijinaq lo k'a pa ratz'ayaq. ²¹ Ewi ri Pedro xk'un lo chuk'u'x taq ri ch'a'tem xub'i'ij kan ri Jesús che ri che'. Xub'i'ij k'u ri' che ri Jesús:

—Wajawal, chilape la, ri che' re higo ri xb'i'ij la che na kuya ta chi ujiq'ob'alil,* wa' chaqijinaq chik —xcha'!

²² Ri Jesús xuk'ul uwach:

—Lik kub'ula ik'u'x ruk' ri Dios; ²³ ma paqatzij wi kamb'i'ij chiwe: China junoq kab'i'n che wa jun juyub!: “Chatela wara y jate'k'ola chupa ri mar” ye ylik kujikib'a' k'u uk'u'x che la xub'i'ij, ri' lik e ku'ana'. ²⁴ Uwari'che kamb'i'ij chiwe: E janipa ri kitz'onoj che ri Dios ye ylik kub'ul k'u ik'u'x che kaya'taj na chiwe, kik'ul na k'u ri'.

²⁵ Jek'ula', echiri' ki'an orar, we k'o chik'u'x ri makunik re junoq chiwij, chikuyu umak cha' jela' ri Qaqaw k'o chila' chikaj kukuy imak ri'ix. ²⁶ Ma we ri'ix na kikuy ta umak junoq, jek'ula' ku'an ri Qaqaw Dios k'o chila' chikaj, na kukuy ta imak ri'ix —xcha'.

China xya'w puq'ab' ri Jesús kataqanik

(Mt. 21:23-27; Lc. 20:1-8)

* **11:21** Mr. 11:14

27 Xeb'opon tanchi Jerusalem ri Jesús kuk' rutijo'n. Y echiri' kab'in chupa ri Rocho Dios, ri nimaq e aj chakunel kuk' raj k'utunel re ri tzijpixab' y ri nimaq winaq re ri tinamit, xeqib' ruk'.
28 Xkitz'onoj k'u che:

—¿China xya'w paq'ab' la ka'an taq la wa'?*
 ¿China xtaqaw la che ka'an taq la wa'? —xecha!.

29 Ri Jesús xuk'ul uwach:
 —Ri'in kan'an jun tz'onob'al che alaq. We xk'ul alaq uwach, kamb'i'ij k'u ri' che alaq china ya'yom panuq'ab' kan'an wa!. **30** ¿China k'u xtaqaw re ri Juan kuya ri bautismo? ¿E ri Dios o e rachijab'? K'ulu alaq uwach —xcha!.

31 Ek'u rike xkijeq kech'a't chikiwach puwi wa': «We xqak'ul uwach che: “E ri Dios xtaqaw re,” ri' kub'l'i'ij rire chiqe: “¿Su'chak k'u ri' na xkoj ta alaq ri xub'i'ij?” kacha chiqe. **32** ¿Yey we xqab'i'ij xa achijab' xetaqaw re...?» xecha chikiwach. Yey lik kakixi'ij kib' chike ri winaq, ma konoje kakich'ob'o ri Juan e jun saqil q'alajisanel re ri Dios.

33 Xkib'i'ij k'u che ri Jesús:

—Na qeta'am taj —xecha!.

Ek'u ri Jesús xub'i'ij chike:

—Jek'uri'la', ri'in na kamb'i'ij ta che alaq china ya'yom panuq'ab' kan'an taq wa'—xcha!.

12

Ri k'amb'al na'oj pakiwi raj chak itzel kiwach-lib'al
(Mt. 21:33-46; Lc. 20:9-19)

* **11:28** Mr. 11:15-16

1 Ek'uchiri', ri Jesús xujeq kak'utun chikiwach ri e aj wach ruk' taq k'amb'al na'oj, xub'i'ij chike:

«K'o jun achi xu'an tiko'n re uva chwach ri rulew. Xusut k'u rij ruk' coral, xuk'ot jun luwar pa kayitz' wi ruwa'al ri uva y xuyak jun ja naj uwi' re chajib'al re. Xuya k'u kan pa tunulik chike jujun aj chakib'. Tek'uchiri', xe'ek naj.

2 »Echiri' xopon ruq'ijol ri molonik, xutaq lo jun raj chak cha' ku'tz'onoj chike taq raj tunulel ri taqalik kuk'ul rire che ri molonik. **3** No'j raj tunulel xkichap raj chak taqom lo kuk', xkich'ayo y xkitaq b'i; e ri' na jinta xkiya b'i che.

4 »Ri rajaw ri tiko'n xutaq chi lo jun raj chak kuk', yey raj tunulel xkiraqij rujolom ruk' ab'aj y lik xkik'ixb'esaj b'i. **5** Ri rajaw ri tiko'n xutaq chi lo jun chik raj chak kuk'; ek'u ri' wa' asu xkikamisaj. Y xeb'utaq chi lo jujun chik; yey chike konoje wa', e k'o ri xekich'ayo y e k'o ri xekikamisaj.

6 »Ek'u ri rajaw ri tiko'n xa jun chi ri k'o ruk' re kutaq b'i, e ruk'ajol lik k'ax kuna'o. K'isb'al k'u re, e xutaq lo ruk'ajol kuk' raj tunulel ma xuch'ob'o: "Ruma e nuk'ajol, kakik'ul na chi utz."

7 »No'j raj tununel xkib'i'ij chikiwach: "Wa' e uk'ajol ri rajaw rulew, ri ku'ana na rajaw we xkam ruqaw. Jo', je'qakamisaj cha' rulew ku'an kan qe'oj" xecha!. **8** Ewi xkichapo y xkikamisaj. Tek'uchiri', xkesaj b'i rucuerpo chupa wa' wu'lew y xe'kik'aqa b'i» xcha ri Jesús.

9 Tek'uchiri', xutz'onoj chike ri e aj wach:

—Chiwach ralaq, ¿sa' nawi ku'an ri rajaw ri tiko'n chike raj tunulel? Ri'in kamb'i'ij: Kak'unik, kusach kiwach raj tunulel y kuya rutiko'n pakiq'ab' jujun chik.

10 »¿Na ajilam ta neb'a ralaq ri tz'ib'ital kan chupa Ruch'a'tem ri Dios? Ma jewa' kub'i'ij:
E rab'aj k'aqital kan kuma raj yakal ja,
e ab'aj wa' lik xajawaxik cha' katiki' lo ri ja.*

11 E ri Dios Qajawxel x'anaw re wa',
yey chiqawach ri'oj, wa' lik na jinta k'ana ilitaji-
naq wi Sal.
118:22-23

—xcha'!

12 Ek'u ri e aj wach lik xkitzukuj su'anik kakichap ri Jesús ma xkimaj usuk' chikij rike xub'i'ij wi wa jun k'amb'al na'oj. Pero rumá k'u kakixi'ij kib' chikiwach ruk'iyal winaq, xkiya kanoq y xeb'ek.

Ri tz'onob'al puwi ri tojonik ka'anik
(Mt. 22:15-22; Lc. 20:20-26)

13 Xetaq k'u lo ruk' ri Jesús jujun chike ri fariseos y jujun chike ri kitaqem ri rey Herodes, re kakik'am upa ruk' taq ri kub'i'ij cha' kakikoj umak. **14** Ek'uchiri', xeb'opon ruk' ri Jesús y xkib'i'ij che:

—Lal tijonel, ri'oj qeta'am lik qatzij ri kab'i'ij la. Na kaxi'ij ta ib' la che taq ri kakib'i'ij ri tikawex, ma rilal junam kiwach keb'il la konoje, tob' k'o kiwach o na jinta kiwach; yey lik jusuk' kak'utun la chwi ri b'e re ri Dios. Kaqatz'onoj k'u che'la: ¿Usuk' nawi kaqa'an tojonik che ri nimalaj taqanel re Roma* o na usuk' taj? ¿Kaqaya nawi o na kaqaya taj? —xecha'.

* **12:10** Is. 28:16; Hch. 4:11; Ro. 9:31-33; 1 P. 2:6-8 * **12:14** “Ri nimalaj taqanel re Roma”: Kil “César, emperador” pa vocabulario.

15 Ek'u ri Jesús, ruma reta'am rike xa keb' kipalaj, jewa' xub'i'ij chike:

—¿Su'chak kak'am alaq nupa? K'ama pe lo alaq juna meyo re ka'an tojonik ruk' cha' kanwilo —xcha'!

16 Rike xkik'am lo jun meyo che.

Ewi ri Jesús xub'i'ij chike:

—¿China re wa k'axwach y china re wa b'i'aj k'o chwach wa meyo? —xcha'.

Rike xkik'ul uwach:

—Re ri nimalaj taqanel re Roma —xecha'.

17 Ek'u ri Jesús xuk'ul uwach, xub'i'ij chike:

—Ya'a alaq che ri nimalaj taqanel re Roma janipa ri taqal che rire, yey ya'a k'u alaq che ri Dios janipa ri taqal che ri Dios —xcha'.

Lik k'u xkam kanimá' che ri Jesús ma Rire lik xuriq uk'ulik uwach ri tz'onob'al xki'an che.

Ri tz'onob'al puwi ri k'astajib'al

(Mt. 22:23-33; Lc. 20:27-40)

18 Ek'uchiri', jujun chike ri saduceos, ri kakib'i'ij na jintana k'astajib'al chike ri ekaminaq, xek'un ruk' ri Jesús y xkitz'onoj k'u che:

19 —Lal tijonel, ri Moisés xutz'ib'aj kan chiqe: “We ri ratz junq kakamik y na e jinta kan ralk'o'al ruk' ri rixoqil, ek'u ri' ruchaq' utz kak'uli' ruk' rixoq malka'n kanoq y jek'ula' kek'oji' ralk'o'al ruk' pub'i' ri ratz xkamik”* xcha'.

20 »Julaj e k'o wuqub' achijab' kichaq' kib'. Ri nab'e chike xk'uli'ik, yey ek'u ri' wa' xkamik y na e jinta kan ralk'o'al ruk' ri rixoqil. **21** Jela' k'u ri' ruka'm xk'uli' ruk' rixoq malka'n kanoq. Ek'u ri'

* **12:19** Dt. 25:5-6

wa' xkamik y na e jinta kan ralk'o'al ruk' rixoq. Yey je tanchi la' xuk'ulumaj rurox. ²² Jek'ula' xkik'ulumaj ri wuqub' achijab'; xekamik, e ri' na jinta kalk'o'al xkiya kanoq. K'isb'al k'u re, e xkam rixoq.

²³ »Chupa k'u ruq'ijol ri k'astajib'al, echiri' kek'astaj lo ri wuqub' achijab', ¿chinoq chike ku'ana rachijil rixoq? Ma konoje xek'uli' ruk' —xecha'!

²⁴ Ri Jesús xuk'ul uwach:

—Ralaq lik sachinaq alaq, ma na majom ta alaq usuk' Ruch'a'tem ri Dios y ruchuq'ab' ri Dios. ²⁵ Ma echiri' kek'astaj lo ri ekaminaq, na kek'uli' ta chik yey na kekiya ta chi ne ri kalk'o'al pa k'ulanikil; keb'u'ana k'u pacha' ri ángeles e k'o chila' chikaj, ma ri ángeles na kek'uli' taj.

²⁶ »No'j puwi k'u ri k'astajib'al ke ri ekaminaq, ¿na ajilam ta neb'a alaq ri xutz'ib'aj kan ri Moisés puwi ri xub'i'ij ri Dios che echiri' xch'a't ruk' chupa ri jumokaj xulukej? Ma jewa' xub'i'ij che: “In ri Dios re ri Abraham, re ri Isaac y re ri Jacob”* xcha'. ²⁷ Yey ri Dios na e ta Dios ke ri ekaminaq, ma e Dios ke ri e k'aslik.† E uwari'che ralaq lik na usuk' ta ri na'oj alaq puwi ri k'astajib'al —xcha'!

*Ritz'onob'al puwi ri tzijpixab' más chirajawaxik
(Mt. 22:34-40)*

²⁸ Ek'uchiri', xqib' ruk' ri Jesús jun chike raj k'utunel re ri tzijpixab'. Wa' wa'chi xuto echiri'

* **12:26** Éx. 3:6, 15 † **12:27** Wa' wa'chijab' ekaminaq chik echiri' ri Dios xub'i'ij wa'. Na ruk' ta k'u ri', e k'as chwach ri Dios. Yey we ta rike sachinaq chi kiwach, ri Dios na kub'i'ij ta ri': “In ri Dios ki'ke.”

ri Jesúz lik xuriq uk'ulik uwach ri tz'onob'al ke ri saduceos. Xutz'onoj k'u che:

—Chupa Rutzij Upixab' ri Dios, ¿pachike ri taqanik más chirajawaxik? —xcha'.

²⁹ Ri Jesúz xuk'ul uwach:

—Ruk'u'xib'al ronoje ri Tzij Pixab' re ri Dios e wa':

Chita', ix aj Israel;

ri Dios Qajawxel, xa jun Rire.

³⁰ K'ax k'u chana'a ra Dios Qajawxel

ruk' ronoje awanima', ruk' ronoje ak'u'x, ruk'
ronoje ana'oj y ruk' ronoje achuq'ab'. *Dt.
6:4-5*

E uk'u'xib'al wa' Rutzij Upixab' ri Dios. ³¹ Yey
ruka'm jewa' kub'i'ij:

K'ax chana'a rawatz-achaq'

jela' pacha' ri k'ax kana' awib' ri'at. *Lv. 19:18*

Na jinta chi k'u juna tzij más k'o uwach chwa taq
wa' —xcha'.

³² Jek'uwa' xub'i'ij raj k'utunel re ri tzijpixab'
che ri Jesúz:

—Lik utz, lal tijonel; lik qatzij ri kab'i'ij la: “Xa
jun ri Dios k'olik y na jinta junoq chik.”* ³³ Yey
ri lik chirajawaxik wi e k'ax kaqana' ri Dios ruk'
ronoje qanima', ruk' ronoje qana'oj, ruk' ronoje
qak'u'x y ruk' ronoje ri qachuq'ab';* yey ri k'ax
keqana' ri qatz-qachaq' jela' pacha' ri k'ax kaqana'
qib' ri'oj.* Wa' e más chirajawaxik chikiwa rawaj
eporom chwi raltar ruk' taq ri kaya'i' chwach ri
Dios* —xcha'.

* **12:32** Dt. 6:4; Is. 45:21 * **12:33** Dt. 6:5 * **12:33** Lv. 19:18

* **12:33** Os. 6:6

³⁴ Echiri' ri Jesús xrilo lik k'o una'oj raj k'utunel re ri tzijpixab', xub'i'ij che:

—Lik xa naqaj lal k'o wi che rutaqanik ri Dios —xcha'.

Y na jinta chi k'u junioq xraj xu'an juna tz'onob'al che.

*Sa' ruwach Rucha'o'n lo ri Dios
(Mt. 22:41-46; Lc. 20:41-44)*

³⁵ Echiri' kak'utun ri Jesús chupa ri Rocho Dios, jewa' xub'i'ij:

—¿Su'b'e raj k'utunel re ri tzijpixab' kakib'i'ij:
“Ri Cristo, Rucha'o'n lo ri Dios, e Ralk'o'al kan ri rey David”? ³⁶ Ma ri David, ruma ri Santowilaj Ruxlab'ixel ri Dios, jewa' xub'i'ij:

Ri Dios Qajawxel xub'i'ij che ri Wajawal:

“Chat-tz'ula pa nuwikiq'ab',

y chawoye'ej na ri q'ij

echiri' keb'enuya ri tzel keb'ilow awe

chuxe' rawaqan”

Sal. 110:1

xcha'.

³⁷ Ek'u ri David kub'i'ij “Wajawal” che Rucha'o'n lo ri Dios. ¿Su'b'e k'u ri' kab'i'xik e Ralk'o'al kan ri rey David? —xcha'.

Y uk'iyal winaq re ri tinamit lik ruk' ronoje kik'u'x kakita ri kub'i'ij.

Ri Jesús kuq'alajisaj ri kimak raj k'utunel re ri tzijpixab'

(Mt. 23:1-36; Lc. 11:37-54; 20:45-47)

³⁸ Ek'u ri Jesús jewa' kub'i'ij chupa ruk'utunik:
«Lik chichajij iwib'; mi'an k'u iwe'ix pacha' ri kaki'an raj k'utunel re ri tzijpixab'. Ma rike e lik kuk'ul kik'u'x ri kejurur chupa ri kiq'u' cha' kilitajik lik k'o kiwach y ri kaya' rutzil kiwach pa

keb'ilitaj wi. ³⁹ Yey pa taq sinagogas y pa taq wa'im lik kuk'ul kik'u'x ri ketz'uyi' chupa ri tz'ulib'al ke ri lik k'o kiwach. ⁴⁰ Rike kakimaj rub'itaq ke rioxoqib'e malka'nib'. Y cha' kayak kiq'ij, kaki'an nimaq ch'ab'al echiri' kaki'an orar. Ruma k'u ri kaki'ano, rike lik unimal k'axk'olil ri kakik'ulu echiri' kaq'at tzij pakiwi!» kacha'.

*Ri qasa'n xuya jun ixoq malka'n
(Lc. 21:1-4)*

⁴¹ Ri Jesús tz'ul pana chwach ri kaxa pa kaya' wi ri qasa'n yey lik kutzutza' echiri' ri winaq kakiya kan ri kiqasa'n chupa ri kaxa. Y lik e k'i ri b'eyomab' kakiya uk'iyal qasa'n.

⁴² Xopon k'u jun ixoq nib'a' yey malka'n y xuya chupa ri kaxa ka'ib' raltaq ko meyo lik na k'i ta rajil.

⁴³ Ek'u ri Jesús xeb'usik'ij rutijo'n y xub'i'ij chike:

—Paqatzij wi kamb'i'ij chiwe: Chwach ri Dios, wa' wi'xoq nib'a' y malka'n, e ne xuya más pa ri kaxa chwa ri xkiya konoje. ⁴⁴ Ma konoje xa e xkiya ruwi' ri kipuaq; no'j wi'xoq tob' lik nib'a' e xuya ronoje ri puaq k'o ruk', wa' e re kuloq' ri lik kajawax che —xcha'.

13

*Ri Jesús kach'a't chwi ruwulixik ri Rocho Dios
(Mt. 24:1-2; Lc. 21:5-6)*

¹ Echiri' xel b'i ri Jesús pa ri Rocho Dios, jun chike rutijo'n jewa' xub'i'ij che:

—Qajawal, ¡chilape la wa chomilaj taq ab'aj y wa nimaq taq ja re ri Rocho Dios!* —xcha'!

² Ri Jesús xuk'ul uwach:

—¿Kawil wa' wa nimaq taq ja? Wara na kakanaj ta kan juna ab'aj chwi juna chik, ma ronoje kawulixik —xcha'.

*Taq ri k'utub'al re ri k'isb'al re ruwachulew
(Mt. 24:3-28; Lc. 17:22-24; 21:7-24)*

³ Ri Jesús xtz'uyi' chwa ri juyub' Olivos, ri k'o chwach pana ri Rocho Dios. Ek'u ri Pedro, ri Jacobo, ri Juan y ri Andrés, xa kitukel xkitz'onoj che:

⁴ —B'i'ij ko la chiqe, ¿jampa nawi ku'ana taq ri' wa'? ¿Yey sa' ri k'utub'al kilitajik echiri' ku'ana'? —xecha'.

⁵ Ek'u ri Jesús xujeq ub'i'xikil chike:

«Lik chichajij iwib' cha' na jinta junq' kasokow iwe'ix. ⁶ Ma lik e k'i ri tikawex kek'unik y xa kakichiq'imaj uwach ri nub'i', jewa' kakib'i'ij: "In ri Cristo, Rucha'o'n lo ri Dios"* kecha'. Y lik e k'i ri kesokotaj kuma rike.

⁷ »Ek'uchiri' kito k'o ch'a'oj jewa' y k'o ch'a'oj jela', mixi'ij iwib' che; ma lik chirajawaxik wi ku'ana taq wa'. No'j na e ta wa' ri k'isb'al re ruwachulew. ⁸ Ma e k'o tinamit keyaktaj chikij jujun chik tinamit y e k'o taqanelab' keyaktaj chikij jujun chik taqanelab'. Ku'an taq kab'raqan che uk'iyal luwar, kape taq numik y ri winaq

* **13:1** “Ri nimaq taq ja re ri Rocho Dios”: Ri sitio pa k'o wi ri Rocho Dios sutum rij ruk' tapia re nima'q taq ab'aj ye y k'o corredor che ruq'ab' ri tapia y chunik'ajal ri sitio k'o jun chomilaj ja keb' upa.

* **13:6** Mt. 24:2-3

kakijeqo lik ketukukik. Ronoje wa' xa e jeqeb'al re ri k'axk'ob'ik kak'unik.

9 »Lik chichajij k'u iwib', ma kixk'am b'i pa taq q'atb'al tzij y kajich' ne ipa chupa taq ri sinagogas. Y ruma k'u ikojom ri nub'i', kixk'am b'i chikiwach ri taqanelab' y chikiwach ri reyes, cha' jela' kiq'alajisaj ri Utzilaj Tzij chikiwach. **10** Lik k'ut chirajawaxik nab'e na katzijox ri Utzilaj Tzij chike konoje ruk'iyal kiwach taq ri tikawex e k'o che ruwachulew. **11** Yey echiri' kixk'am b'i re kixe'yo'q pa taq q'atb'al tzij, mub'isoj ik'u'x y mich'ob' nenare' sa' ri kib'i'ij. Ri'ix xew chib'i'ij janipa ri kuya ri Dios chiwe chupa ri ora, ma na ix ta ri kixch'awik, e ri Santowilaj Ruxlab'ixel ri Dios.

12 »E taq k'u ri tikawex kekiya ri katz-kichaq' pa kamik; ri k'o kalk'o'al kekiya taq ri kalk'o'al pa kamik; ri e alk'o'al keyaktaj chikij kichu-kiqaw y kekikamisaj. **13** Lik k'ut tzel kixil kuma taq ri winaq ruma ikojom ri nub'i'. Pero china k'u ri kuchuq'ub'ej rib' chwach taq wa' wa k'axk'ob'ik k'a chupa ri k'isb'al re, e ri' ri kakolob'etajik.

14 »Echiri' ri'ix kiwil ri lik ch'ul y lik k'ixb'al uwach kaya' pa ri luwar pa lik na taqal ta wi, jela' pacha' ri xutz'ib'aj kan ri q'alajisanel Daniel* (china k'u ri kajilan re wa', chumaja usuk'); ek'uchiri', ri e k'o pa taq ri luwar re Judea, cheb'animaj ub'i chwa taq ri juyub'. **15** China k'u ri k'o lo chwi ri rocho,† maqaj ne lo che uk'amik

* **13:14** Dn. 9:27; 11:31; 12:11 † **13:15** Ruwi ri kocho raj Israel ojertan taq'aj uwi' yey wa' kuriq uchak re anab'al oración, re kiwa'b'al y re kiwarab'al chaq'ab' echiri' lik kab'ukb'utik.

b'i ub'itaq re pa ja. ¹⁶ Yey china ri k'o lo pa juyub', matzelej lo che uk'amik b'i ruq'u' re pisb'al rij.

¹⁷ »Chupa taq k'u la' la q'ij, lik toq'o' kiwach ri e yewa' ixoqib' y ri ketz'umtisanik. ¹⁸ Lik k'u chitz'onoj che ri Dios cha' echiri' kixanimaj b'i na e ta uq'ijol echiri' k'ax tew y k'o jab'. ¹⁹ Ma taq la' la q'ij re unimal k'axk'olil, na u'anom ta k'ana julajoq chwi lo echiri' ri Dios xu'an ruwachulew y na ku'ana ta chi ne k'ana julajoq. ²⁰ We ta ri Qaqaw Dios na kuq'atij ta taq la' la q'ij re runimal k'axk'ob'ik, ri' na jinta junooq kak'asi' kanoq; no'j rumá k'u k'ax keb'una' ri eb'ucha'om, kuq'atij ruq'ijol wa'!

²¹ »We k'o k'u junooq kab'i'n chiwe: “¡Chiwilape', wara k'o wi ri Cristo!” o “¡Chiwilape', le' k'olik!”, mixok il che. ²² Ma kek'un ri kaki'an “Cristo” che kib' y ri kaki'an e q'alajisanelab' re ri Dios che kib', pero xa e sokoso'nel. Ek'u rike kaki'an nimaq taq k'utub'al y milagros re kesokoso'n ruk', yey k'o ne pa saq kesokotaj jujun chike ri eb'ucha'om ri Dios. ²³ Lik k'u chichajij iwib', ma ximb'i'ij ronoje wa' chiwe ri'ix echiri' k'amaja' ne ku'ana!.

*Ruk'unib'al Ralaxel Chikixo'l Tikawex
(Mt. 24:29-35, 42-44; Lc. 21:25-36)*

²⁴ »Ek'uchiri' ik'owinaq chi ri k'axk'ob'ik che taq la' la q'ij, ku'an q'equ'm uwach ri' ri q'ij, y ri ik' na kuya ta chi ruwonib'al. ²⁵ Ri ch'umil ketzaq lo che ruwa kaj, y konoje ri k'o kichuq'ab' che ruwa kaj keyikiyo'xik. ²⁶ Ek'uchiri', kilitaj Ralaxel Chikixo'l Tikawex kak'un lo pa sutz' ruk' runimal uchuq'ab' y ruk' runimal uchomalil.* ²⁷ Keb'utaq k'u ru

* **13:26** Dn. 7:13; Ap. 1:7

ángelos che umolik kichi' konoje ri eb'ucha'om ri Dios pa taq ronoje luwar che rukajchal rajlib'al ruwachulew.[‡] Kujeq k'u ri' che jun luwar, yey kuk'isb'ej che jun chik.

²⁸ »E chimaja ri jun k'amb'al na'oj puwi ri che' re higo: Echiri' kujeq katux lo k'ak' uq'ab' y kujeq k'ut katux ruxaq, ruma k'u la' kiweta'maj xa naqaj chi k'o wi lo ruq'ijol echiri' kab'ukb'utik y na jinta jab'.[§] ²⁹ Jek'uri'la' ri'ix, echiri' kiwilo ku'ana ronoje taq wa', chiweta'maj k'u ri' xa naqaj chi k'o wi lo ruq'ijol ruk'unib'al Ralaxel Chikixo'l Tikawex. ³⁰ Paqatzij wi kamb'i'ij chiwe: E k'o tikawex re wa' wa q'ij na kekam tana we na xkil tub'i ronoje wa'. ³¹ Ruwa kaj y ruwachulew xa kasach uwach, no'j taq ri nuch'a'tem na kasach ta uwach.

³² »Ek'u chwi ruq'ijol y ru'orayil wa', na jinta junqoq eta'mayom re; na keta'am tane ri ángeles e k'o chila' chikaj, na reta'am tane ri K'ajolaxel, ma xew ri Qaqaw Dios eta'mayom re.

³³ »Chiwila k'u ri', mawar iwach y lik chi'ana orar, ma na iweta'am taj jampala' kopon ruq'ijol wa'. ³⁴ Ri ku'ana' e pacha' echiri' juna achi ke'ek naj. Ek'uchiri' ke'ek, kuya kan ri rocho pakiq'ab' ri raj chakib' y chikijujunal wa' kuya kan kichak. Kub'i'ij k'u kan che ri chajinel re ri puerta: “Lik matkos che uchajixik ri ja” kacha!. ³⁵ Jek'uri'la' ri'ix, lik mawar iwach, ma na iweta'am taj jampala' kak'un lo ri rajaw ja; laj echiri' kok raq'ab',

[‡] **13:27** “Rukajchal rajlib'al ruwachulew”: Wa' ke'elawi pa norte, pa sur, pa rebel'al q'ij y putzaqib'al q'ij. [§] **13:28** “Ruq'ijol echiri' kab'ukb'utik y na jinta jab'”: Kil “verano” pa vocabulario.

laj pa tik'il aq'ab', laj pa nab'e uch'awib'al ri teren o echiri' kel lo ri q'ij. ³⁶ Mawar k'u iwach ri', cha' we xaqik'ate't xk'un lo ri Iwajaw, na kixuriq taj kixwarik. ³⁷ Ek'u wa kamb'i'ij ri'in chiwe ri'ix, kamb'i'ij chike konoje: Lik mawar iwach» xcha ri Jesús.

14

*Ri e aj k'amal wach re ri tinamit kakich'a'tib'ej su'anik kakichap ri Jesús
(Mt. 26:1-5; Lc. 22:1-2; Jn. 11:45-53)*

¹ Echiri' keb' q'ij chi kopon wi ri nimaq'ij Pascua y ri nimaq'ij re tijoj pam na jinta levadura che,* taq ri nimaq e aj chakunel pa Rocho Dios kuk'raj k'utunel re ri tzijpixab', lik kakitzukuj su'anik kakichap ri Jesús ruk' sokoso'nik re kakikamisaj. ² Xkib'i'ij k'ut: «Na kaqa'an ta pa wa nimaq'ij cha' ri tinamit na ketukuk ta rumá wa!» xecha'.

*Jun ixoq kuq'ej kunab'al ki' ruxlab' chu'jolom ri Jesús
(Mt. 26:6-13; Jn. 12:1-8)*

³ K'o k'u ri Jesús pa ri tinamit Betania chirocho ri Simón, ri jun xk'oji' ri yab'il lepra che. Ek'uchiri' tz'ul ri Jesús chwa ri mexa, xopon jun ixoq ruk'a'am jun k'olib'al nojinaq che kunab'al lik ki' ruxlab' y lik k'i rajil, wa' 'anatal ruk' saqil nardo. Rixoq xuteq'ij uchi' ri k'olib'al; tek'uchiri', xuq'ej ri kunab'al chu'jolom ri Jesús.

* **14:1** Xew kak'is ri nimaq'ij Pascua, kajejer ri wuqub' q'ij re ri nimaq'ij echiri' raj Israel na kakitij ta pam k'o levadura che. Éx. 12; Dt. 16:1-17; Lv. 23:5-6

4 E k'o k'u jujun chike ri e k'o chiriri' xpe koyowal echiri' xkil wa', y jewa' xkib'i'ij chikiwach:

—¿Su'chak wa kunab'al xtz'iloxik? **5** Ma ri lik usuk' e ta xk'ayix wa' chi oxib' ciento denarios, y ruk' wa' keto' ri nib'a'ib' —xecha'. Y lik k'u ri' kech'a't chirij rixoq.

6 Ek'u ri Jesúus xub'i'ij chike:

—Mik'aq b'i uq'iij wi'xoq. ¿Su'b'e kixch'a't chirij ri xu'ano? Ma ri xu'an chwe e jun utzilaj chak. **7** Ri nib'a'ib' e la' xaqi e k'o iwuk' yey utz keb'ito'o jampala' kiwaj ri'ix, no'j ri'in na xaqi ta in k'o iwuk'. **8** Wi'xoq e xu'ano janipa ri xuch'ij u'anikil; ruk' k'u wa' e xnab'ej pan che uyib'axik ri nucuerpo che ri muqub'al we.† **9** Paqatzij wi kamb'i'ij chiwe: Pa taq katzijox wi wa Utzilaj Tzij che ronoje ruwachulew, kakuxtax k'u wi'xoq rumá ri xu'ano —xcha'.

*Ri Judas kuk'ayij ri Jesúus
(Mt. 26:14-16; Lc. 22:3-6)*

10 Ewi ri Judas aj Iscariot, jun chike ri kab'lajuj utijo'n ri Jesúus, xe'ek kuk' ri nimaq e aj chakunel pa Rocho Dios re kuya ri Jesúus pakiq'ab'. **11** Rike, echiri' xkita wa', lik xeki'kot che y xkib'i'tisij nenare' kakiya puaq che. Ek'u ri' ri Judas xujeq utzukuxik su'anik kuya ri Jesúus pakiq'ab'.

*Ri Jesúus kutij ri cena re Pascua kuk' ri kab'lajuj
utijo'n
(Mt. 26:17-29; Lc. 22:7-23; Jn. 13:21-30; 1 Co.
11:23-26)*

† **14:8** Echiri' kakam junoq, raj judi'ab' kakatinisaj ri cuerpo y kakikoj kunab'al ki' ruxlab' che.

12 Chupa k'u ri nab'e q'ij re ri nimaq'ij echiri' katij ri pam na jinta levadura che y kekamisax chwi raltar taq ri q'apoj b'exex re ri Pascua,* rutijo'n ri Jesús xkitz'onoj che:

—¿Pa ka'aj wi la ke'qayib'a' wi ri cena re Pascua? —xecha'.

13 Ewi xeb'utaq b'i ka'ib' chike rutijo'n y xub'i'ij b'i chike:

—Jix pa ri tinamit y echiri' kik'ul jun achi ruk'a'am jun kura' ya', chixterej b'i chirij. **14** Pa k'u kok wub'i wa' wa'chi, chib'i'ij che ri rajaw ja: “Jewa' kub'i'ij ri tijonel qe'oj: ¿Pachawi k'o wi ri luwar pa kantij wi ri cena re Pascua kuk' ri nutijo'n?” kixcha che. **15** Ek'u ri ku'an ri rajaw ja e kuk'ut chiwe jun nimalaj luwar chikaj pa ri kale' ja, wa' yib'ital chik. Chiri' k'u ri' chiyib'a' wi ri cena re Pascua —xcha'.

16 Xeb'ek k'u rutijo'n, xeb'ok pa ri tinamit y xe'kiriqa' jela' pacha' ri xub'i'ij b'i ri Jesús chike. Y xkiyib'a' k'u ri cena re Pascua.

17 Ek'uchiri' xok raq'ab', xopon ri Jesús junam kuk' ri kab'lajuj utijo'n. **18** Ek'uchiri' e k'o chwa ri mexa, e ri' kewa'ik, ri Jesús xub'i'ij:

—Paqatzij wi kamb'i'ij chiwe: Jun chiwe wa ix k'o wara wuk' pa wa'im, e kak'ayin we —xcha'.

19 Ewi rike xkijeq lik keb'isonik y chikijujunal kakitz'onoj che:

—¿K'axtaj in ri'? —kacha jun.

—¿K'axtaj in ri'? —kacha jun chik.

20 Ri Jesús xuk'ul uwach; jewa' xub'i'ij:

—Wa' e jun chiwe wa ix kab'lajuj, e ri kumu' lo ruwa junam wuk' chupa ri laq. **21** Paqatzij

* **14:12** Éx. 12:1-13; Lv. 23:5-6

wi Ralaxel Chikixo'l Tikawex e katajin che rik'owib'exik janipa ri tz'ib'ital kan chupa Ruch'a'tem ri Dios puwi Rire. Pero jlik k'u toq'o' uwach rachi kak'ayin re! E ne más utz che wa'chi tamaji xalaxik —xcha'!

²² Xaloq' k'u ri' kewa'ik, ri Jesús xuk'am ri pam y xutioxij che ri Dios. Ewi xuwech'o, xujach chike y jek'uwa' xub'i'ij:

—Chitija', ma e nucuerpo wa' —xcha'.

²³ Xuk'am k'u ri k'olib'al k'o vino chupa, yej echiri' utioxim chi che ri Dios, xuya chike y konoje xkitij chuchi' wa' wa k'olib'al. ²⁴ Xub'i'ij k'u chike:

—E nukik'el wa', ri katuruw na kuma uk'iyal tikawex re kuyb'al kimak, yej wa' e kujikib'a' uwach ri k'ak' tzij.* ²⁵ Paqatzij wi kamb'i'ij chiwe: Na kantij ta chi ruwa'al uva, k'ate ki'ntija tanchi chupa ruql'ijol rutaqanik ri Dios —xcha'.

Ri Jesús kuq'alajisaj ri ku'an ri Pedro echiri' kare-waj we reta'am uwach

(Mt. 26:30-35; Lc. 22:31-34; Jn. 13:36-38)

²⁶ Echiri' xkik'is ub'ioxoxik ri b'ix,‡ xeb'ek chwa ri juyub' Olivos. ²⁷ Ek'uchiri' ri Jesús xub'i'ij chike:

—Waq'ab' iwonoje ri'ix kiwesaj na iwib' chwij, ma e pacha' kub'i'ij Ruch'a'tem ri Dios: Kankamisaj raj chajinel yej taq k'u ri' rub'exex kakikich b'i kib' *Zac. 13:7* kacha'.

²⁸ No'j ek'uchiri' kink'astaj lo chikixo'l ri ekaminaq, kinnab'ej b'i chiwach k'a Galilea —xcha'.

²⁹ Ek'u ri Pedro xub'i'ij:

* **14:24** Jer. 31:31-34 ‡ **14:26** K'isb'al re ri cena re Pascua, ri kaki'an raj judi'ab' e kakib'ixoj ri Salmos 115-118.

—Tob' ne konoje kakesaj kib' chi'ij la, ri'in na kan'an ta wa'—xcha'.

³⁰ Yey ri Jesús xuk'ul uwach:

—Paqatzij wi kamb'i'ij chawé: Wa jun aq'ab', echiri' k'amaja' ne kab'ixon kalaj ri teren, ri'at oxlaj chik ab'i'im na aweta'am ta nuwach —xcha'.

³¹ No'j ri Pedro lik xujikib'a' ub'i'xikil:

—Tob' ne chirajawaxik kinkam junam uk' la, ri'in na kanwewaj taj we weta'am wach la —xcha'. Jek'ula' ri' xkib'i'ij konoje.

*Ri Jesús ku'an orar pa ri werta Getsemani
(Mt. 26:36-46; Lc. 22:39-46)*

³² Xeb'opon k'u pa jun luwar Getsemaní rub'i'. Ek'u ri Jesús xub'i'ij chike rutijo'n:

—Chixtz'ula kan wara, no'j ri'in ki'n'ana orar —xcha'.

³³ Yey xeb'uk'am k'u b'i ri Pedro, ri Jacobo y ri Juan ruk'. Xujeq k'u ri'lik kab'isonik y kak'axk'ob' ri ranima'. ³⁴ Xub'i'ij k'u chike:

—K'o jun unimal b'is re kamik chinuk'u'x. Chixk'ola kan wara; mixwarik y lik chi'ana orar —xcha'.

³⁵ Tek'uchiri', ri Jesús xqib' chi pana jub'iq' chwach, xuqasaj umejelem k'a chu'lew, y xutz'onoj che ri Dios we ta kuya na che na kik'ow ta chupa ru'orayil ri k'axk'ob'ik, ³⁶ jewa' xub'i'ij:

«Tat, Lal Nuqaw, chiwach Rilal na jintu k'ana k'ayew; chinkolob'ej ko la cha' na kinik'ow ta chupa wa' wa k'axk'ob'ik. No'j na e ta k'u chu'ana ri kuaj ri'in, ma e chu'ana' janipa ri ka'aj Rilal» xcha'.

³⁷ Tek'uchiri', xtzelej lo pa e k'o wi kan rutijo'n y xeb'o'l'u'riqa' kewarik. Xub'i'ij k'u che ri Pedro:

—¿Katwar kami ri'? ¿Na xakuy ta k'ana ri waram cha' ka'an orar wuk', tob' tane xa juna ora? ³⁸ Mixwar k'ut, y lik chi'ana orar cha' kich'ij uchuq'ab' ri k'amb'al ipa kapetik. Paqatzij wi, lik kacha ik'u'x che u'anik ri utz, no'j wa' lik k'ayew chiwe ma e ri itil'jil na jinta ukowil —xcha'.

³⁹ Ek'u ri Jesús xe'ek tanchik, xu'ana orar, ye yey e xutz'onoj che ri Dios ri ujeqom chi lo utz'onoj xik nab'e. ⁴⁰ Tek'uchiri', xtzelej tanchi lo kuk' rutijo'n y xeb'o'l'u'riqa' kewarik; ma ri kiwach lik na kukuy ta chi ri waram y na kakiriq ta chik sa' ri kakib'i'ij che. ⁴¹ Xtzelej k'u lo churox laj y xub'i'ij chike:

—¿K'a kixwar kami ri' ri'ix? ¿K'a kixuxlanik? ¡Ku'an na k'u la'! Ma e wa' xopon ru'orayil cha' Ralaxel Chikixo'l Tikawex kaya' pakiq'ab' raj makib'. ⁴² ¡Chixwa'lijoq! ¡Jo!! Chiwila', ma ri kak'ayin we ri'in e la' xk'unik —xcha'.

Kachap b'i ri Jesús

(Mt. 26:47-56; Lc. 22:47-53; Jn. 18:2-11)

⁴³ K'a kach'a't ne ri Jesús echiri' xk'un lo ri Judas, jun chike ri kab'lajuj utijo'n. Ek'u rire erachb'ilam lo uk'iyal winaq kuk'a'am lo espada y che'. Taq wa' etaqom lo kuma ri nimaq e aj chakunel pa Rocho Dios, taq raj k'utunel re ri tzijpixab' y ri nimaq winaq re ri tinamit.

⁴⁴ Ek'u ri Judas, ri kaya'w b'i re pakiq'ab', ub'i'im chi lo chike su'anik kaketa'maj china ri kakichapo, jewa' ub'i'im: «E ri jun kantz'ub' uchi', e ri' rire. Chapa k'u alaq y k'ama b'i alaq, yey chekojo b'i alaq e chajinel re cha' na kanimaj tub'i» xcha'.

45 Ek'uchiri' xk'unik, maji chik xqib' ruk' ri Jesús y xub'i'ij che:

—¡Wajawal, Wajawal! —xcha che. Y xutz'ub' uchi'.

46 Ek'uchiri', ri winaq xkichap ri Jesús cha' kakik'am b'i pa q'atb'al tzij.

47 K'o k'u jun chike rutijo'n e k'o chiril, xresaj lo ru espada y xujochij b'i jun uxikin ri raj chak ri kajawal raj chakunel pa Rocho Dios.

48 Xub'i'ij k'u ri Jesús chike:

—¿Su'chak petinaq alaq ruk' espada y che'?
¿Petinaq kami alaq che uk'amik b'i juna eleq'om?

49 Wa petinaq loq ronoje q'ij wa' k'ut kink'utun chiwach alaq pa ri Rocho Dios. ¿Su'chak k'u ri' k'a e la' kino'lchapa alaq? No'j jek'uwa' ku'ano cha' e ku'ana janipa ri q'alajisam kan chupa Ruch'a'tem ri Dios —xcha chike.

50 Tek'uchiri', konoje rutijo'n xeb'animajik y jela' xkiya kan ri Jesús.

Jun ala kanimajik

51 K'o k'u jun ala teran b'i chirij ri Jesús, upisom rib' xa chupa jun sábana; rire xchap kuma ri soldados. **52** Pero rala xusolij kan rusábana y e la' ch'analik xanimajik.

*Ri Jesús k'o chikiwach raj q'atal tzij e aj judi'ab'
(Mt. 26:57-68; Lc. 22:54-55, 63-71; Jn. 18:12-14,
19-24)*

53 Xkik'am k'u b'i ri Jesús chwach ri kajawal raj chakunel pa Rocho Dios. Tek'uchiri', xkimol kib' ri nimaq e aj chakunel kuk' ri nimaq winaq re ri tinamit y raj k'utunel re ri tzijpixab'.

54 Ek'u ri Pedro xa naj teran pan chirij ri Jesús y xok b'i k'a che ruwa ja re ri rocho ri kajawal raj chakunel pa Rocho Dios. Xe'tz'ula k'u kuk' ri e chajinel, e ri' kumiq'isaj rib' chuchi' ri aq'.

55 Ri nimaq e aj chakunel pa Rocho Dios kuk' konoje ri uchapom wi rib' ri q'atb'al tzij, kakitzukuj su'anik kakikoj umak ri Jesús cha' jela' utz kaq'at tzij re kamik puwi', no'j na jinta k'o xkiriq chirij. **56** Ma lik e k'l ri winaq xkitz'aq uchi', pero lik junwi taq ri xkitz'iq'. **57** Ewi xeyaktaj jujun y xkitz'aq uchi', jewa' xkitz'iq' chirij:

58—Ri'oj xqato echiri' xub'i'ij: “Kanwulij wa Rocho Dios 'anatal xa kuma rachijab', yey xa pa oxib' q'ij kanyak jun chik na 'anatal ta kuma rachijab” —xecha!. **59** Na ruk' ta k'u ri', lik junwi taq ri xkitz'iq'.

60 Ewi ri kajawal raj chakunel pa Rocho Dios xyaktaj chikixo'l y xutz'onoj che ri Jesús:

—¿E kami la' na jinta k'ana kab'i'ij ri'at? ¿Sa' k'u ri kak'ulub'ej uwach puwi wa ketajin che ukojik chawij? —xcha!.

61 Pero ri Jesús xa xuto y na jinta k'o xub'i'ij. Tek'uchiri', xu'an jun chik tz'onob'al che ri Jesús:

—¿At b'a ri' ri Cristo, Ruk'ajol ri Dios, ri Jun lik nim uq'ij? —xcha che.

62 Ri Jesús xuk'ul uwach:

—Qatzij, “In Ri'in.” Kil na k'u alaq Ralaxel Chikixo'l Tikawex tz'ul puwikiq'ab' ri Dios, ri lik k'o unimal uchuq'ab' yey kil k'u alaq ri' echiri' kak'un lo pa sutz' chwa ri kaj* —xcha!.

* **14:62** Dn. 7:13; Ap. 1:7

63 Ek'u ri kajawal raj chakunel pa Rocho Dios xurich'ij ruq'u' y xub'i'ij:

—¡Na jinta chi uchak más e aj kojol umak! **64** Ma lik e la' xta alaq xmakun chirij ri Dios echiri' xub'i'ij ri lik na taqal ta che. ¿Sa' k'u ri' kab'i'ij ralaq che? —xcha'.

Ewi konoje xkiq'at tzij puwi ri Jesús y xkib'i'ij lik taqal che kakamisaxik.

65 Y e k'o jujun xkijeq kakichub'aj; kakich'uq rupalaj, kaki'an pa t'o'y yey kakib'i'ij k'u che:

—Chana'ij pe' china xch'ayaw awe —kecha che. Yey ri e chajinel kakipach' q'ab' chupalaj.

*Ri Pedro kub'i'ij na reta'am ta uwach ri Jesús
(Mt. 26:69-75; Lc. 22:55-62; Jn. 18:15-18, 25-27)*

66 Ek'u ri Pedro k'o ikem che ruwa ja echiri' xk'un lo jun ali raj chak ri kajawal raj chakunel pa Rocho Dios. **67** Ek'uchiri' rali xril ri Pedro kumiq'isaj rib' chuchi' ri aq', lik xutzutza' uwach y xub'i'ij che:

—Rilal lal jun chike ri eteran chirij ri Jesús ri aj Nazaret —xcha che.

68 Ewi ri Pedro xrewaj, jewa' xuk'ul uwach:

—Ri'in na weta'am ta uwach y na weta'am tane sa' puwi' katch'a't wi —xcha'. Xel k'u b'i chuchi' ri puerta. Tek'uchiri', xch'aw ri teren.

69 Ek'u rali aj chak echiri' xril tanchi ri Pedro, xujeq ub'i'xikil chike taq ri e k'o chirij:

—Wa'wa'chi e jun chike rutijo'n ri Jesús —xcha'.

70 No'j ri Pedro xrewaj tanchik. Joq'otaj k'u ri', e taq ri e k'o chirij xkib'i'ij tanchi che ri Pedro:

—Paqatzij wi rilal lal jun chike rutijo'n; lik q'alaj lal aj Galilea, ma ri kach'a't la e junam ruk' ri kech'a't rike —xecha'.

⁷¹ Ewi ri Pedro xujeq ub'i'xikil itzel taq tzij y lik xujikib'a' uwach, xub'i'ij:

—Ri'in na weta'am ta k'ana uwach wa' wa'chi kab'i'ij alaq —xcha'.

⁷² Ek'u ri teren xch'aw chukalaj. Ewi xk'un lo chuk'u'x ri Pedro ri xb'i'x lo che ruma ri Jesús: «K'amaja' ne kab'ixon ri teren chukalaj, ri'at oxlaj chik ab'i'im na aweta'am ta nuwach.» Ek'u katajin wa' pujolom, xumaj roq'ej.

15

*Katz'aq uchi' ri Jesús chwach ri taqanel Pilato
(Mt. 27:11-14; Jn. 18:33-40)*

¹ Echiri' xsaqirik, ri nimaq e aj chakunel pa Rocho Dios kuk' taq ri nimaq winaq re ri tinamit, raj k'utunel re ri tzijpixab' y konoje ri uchapom wi rib' ri q'atb'al tzij, ki'anom chi tzij chikiwach puwi sa' ri kaki'an ruk' ri Jesús. Xkik'am k'u b'i ri Jesús yutatalik y xe'kiya'a chwach ri taqanel Pilato. ² Ri Pilato xutz'onoj k'u che ri Jesús:

—¿Lal kami ri' ri rey ke raj judi'ab'? —xcha che.

Ri Jesús xuk'ul uwach:

—Lal kab'i'n la re —xcha che.

³ Yey ri nimaq e aj chakunel pa Rocho Dios lik kakitz'aq uchi'.

⁴ Xutz'onoj tanchi k'u ri taqanel Pilato che:

—¿E kami la' na kak'ul ta la uwach? ¿Na kata ta kami la janipa chi mak kakikoj chi'ij la? —xcha che.

5 Na ruk' ta k'u ri', ri Jesús na xuk'ul ta uwach. Ruma k'u wa', ri Pilato lik xkam ranima' che.

*Kaq'at tzij re kamik puwi ri Jesús
(Mt. 27:15-31; Lc. 23:13-25; Jn. 19:1-16)*

6 Chupa k'u ri nimaq'ij Pascua, ri taqanel romano xex ku'an wi kuyolopij b'i jun chike ri e k'o pa cárcel, yey e ri winaq kecha'wik china ri kakaj kayolopix b'i. **7** K'o k'u jun achi Barrabás rub'i', rire k'o pa cárcel kuk' jujun rachb'i'il ruma xki'an kamik echiri' xeyaktaj chirij ri taqanel aj Roma. **8** Xeb'opon k'u uk'iyal winaq chwach ri taqanel Pilato y xkijeq utz'oxonik che e ku'an pacha' taq ri u'anom lo ronoje junab'.

9 Ewi ri taqanel Pilato xutz'onoj chike:

—¿Ka'aj alaq kanyolopij b'i ri rey ke raj judi'ab'?
—xcha'. **10** Xub'iij wa' ma reta'am ri nimaq e aj chakunel pa Rocho Dios xe'kiya'a ri Jesús chwach, xa ruma k'ax kik'u'x chirij.

11 Ek'u ri nimaq e aj chakunel pa Rocho Dios xkikoj pa kijolom ri uk'iyal winaq e kakitz'onoj kayolopix b'i ri Barrabás. Yey rike jela' xki'ano.

12 Ri Pilato xutz'onoj tanchi chike:

—¿Sa' k'u ri' ka'aj alaq kan'an ruk' ri kab'iij alaq e rey ke raj judi'ab'? —xcha'.

13 Yey ri winaq lik xesik'in tanchi che uk'ulik uwach:

—¡Kamisax chwa cruz! —xecha'.

14 Ek'u ri taqanel Pilato xutz'onoj chike:

—¿Sa' k'u rumak u'anom? —xcha'.

No'j ri winaq más ko xesik'inik:

—¡Kamisax chwa cruz! —xecha'.

15 Ewi ri Pilato xa ruma xraj kakanaj kan chi utz kuk' ruk'iyal winaq, e xuyolopij b'i ri Barrabás. Yey xeb'utaq ri soldados che ujich'ik upa ri Jesús. Tek'uchirí', xuya b'i pakiq'ab' re kakikamisaj chwa cruz.

16 Ri soldados xkik'am k'u b'i ri Jesús che ruwa ja re rupalacio ri taqanel. Chiri' xmoli' kichi' konoje taq ri soldados. **17** Ek'u ri soldados xkikoj jun k'ul morato* che ri Jesús. Che k'u rujolom xkikoj jun corona pach'um ruk' k'iix. **18** Xkijeq k'u kesik'in che, jewa' kakib'i'ij:

—¡Nim uq'ij ri rey ke raj judi'ab'! —kecha'!

19 Kakich'ay rujolom ruk' jukutaj taní y kakichub'aj rupalaj. Kakixukub'a' k'u kib' chwach, lik xa u'anikil kakiyak uq'ij. **20** Echiri' ya lik xkich'amij, xkesaj ri k'ul morato kikojom che y xkikoj tanchi ruq'u'. Xkesaj k'u b'i cha' ke'kikamisaj chwa cruz.

Rukamik ri Jesús chwa ri cruz

(Mt. 27:32-56; Lc. 23:26-49; Jn. 19:17-30)

21 K'o k'u jun achi aj Cirene petinaq pa juyub' e ri'kik'ow chiri'. Ek'u ri soldados xkitaq che kutelej b'i ri cruz re ri Jesús. Rachi, Simón rub'i', rire e kiqaw ri Alejandro y Rufo.

22 Y xkik'am b'i ri Jesús pa jun luwar Gólgota kab'i'x che, wa' ke'elawi "luwar re ub'aqil ujolom anima'". **23** Yey xkiya' che ri Jesús vino kojotal mirra ruk'; no'j Rire na xutij taj.

24 Echiri' kiya'om chi ri Jesús chwa ri cruz, ri soldados ruk' jun sorteo xkijach kib' puwi ruq'u' cha' kakilo sa' taq ri kakik'am b'i chikijujunal.

* **15:17** "Morato": Kil "púrpura" pa vocabulario.

²⁵ Anim che ri ub'elej ora,[†] xkiya ri Jesús chwa ri cruz. ²⁶ Chwi k'u lo rucruz ri Jesús tz'ib'italik su'b'e xq'at tzij puwi', jewa' kub'i'ij: «RI REY KE RAJ JUDÍ'AB'».

²⁷ Xekiya k'u ka'ib' eleq'omab' chwa cruz, jun puwikuq'ab' y jun pumox ri Jesús.

²⁸ Ek'u xu'ana ri' ri tz'ib'ital kan chupa Rutzij Upixab' ri Dios:

E jun Rire xajilax b'i kuk' ri winaq itzel kik'u'x. *Is. 53:12*

²⁹ Ri winaq keb'ik'ow chirí' kakiyoq' kanoq, kakiyiriya' ri kijolom che y jek'uwa' kakib'i'ij che:

—¡Ah! At pe' ri ab'i'im kawulij ri Rocho Dios y xa pa oxib' q'ij kayak tanchik. ³⁰ Chakolob'ej k'u awib' ri' y chatqaj lo chwa ri cruz —kecha'.

³¹ Jenela' ri' xki'an ri nimaq e aj chakunel pa Rocho Dios junam kuk' raj k'utunel re ri tzijpixab'; rike lik kakich'amij, jewa' kakib'i'ij chikiwach:

—Lik wa' k'ut e k'i ri xeb'ukolob'ej che taq yab'il y che kamik, yey na kuriq ta wa' ukolob'exik rib' rire. ³² La' la'chi kab'i'x “Cristo, Rey ke Raj Israel” che, qaja lo ri' utukel chwa ri cruz cha' kaqilo y jela' kaqakojo e rire ri Ucha'o'n lo ri Dios —kecha'.

Y jenela' ri ka'ib' eya'om chwa cruz junam ruk', lik xkich'amij Rire.

³³ Ek'uchiri' xtik'oj ri q'ij, xok q'equ'm che ruwachulew y wa' xu'k'isa k'a che ri urox ora b'enaq q'ij. ³⁴ Chupa k'u la' la ora, ri Jesús lik ko xsik'inik, jewa' xub'i'ij pa ri ch'a'tem kach'a't wi Rire:

† **15:25** “Ri ub'elej ora”: Kil “hora” pa vocabulario.

—*Eloi, Eloi, ¿lama sabactani?* —xcha!. Wa'ke'elawi: “Lal nu Dios, Lal nu Dios, ¿su'b'e xi-noq'otaj kan la?”*

³⁵ Jujun k'u chike ri e k'o chirí!, echirí' xkita wa', xkib'i'ij:

—Chitape', wa'chi e kusik'ij ri q'alajisanel Elías —xecha!.

³⁶ K'o k'u jun xe'ek lik kanik, xumu' jun esponja pa vinagre, xuxim k'u chutza'm jun taní y xuya pan che ri Jesús re kutz'ub'u, y jek'uwa' xub'i'ij:

—Qila pe' we kak'un ri Elías re kolu'qasaj lo chwa ri cruz —xcha!.

³⁷ No'j ri Jesús lik ko xsik'inik y jela' xkamik.

³⁸ Ek'uchirí', ri telón k'o chupa ri Rocho Dios‡ xrich'rob' chunik'ajal; xupeq lo puwi' y xo'lk'is k'a chuxe'.

³⁹ Ek'u ri capitán§ tak'al chwach ri Jesús, echirí' xuto xsik'inik ye y xrido sa' rukamik, jewa' xub'i'ij:

—¡Paqatzij wi, wa' wa'chi e Uk'ajol ri Dios! —xcha!.

⁴⁰ E k'o k'u jujun ixoqib' kakitzutza' pana chinimanaj. Chikixo'l wa' e k'o ri María ri aj Magdala, ri Salomé y ri María kichu ri Jacobo (ri más k'ak'al) y ri José. ⁴¹ Wa' wa ixoqib' lik xeterej chirij ri Jesús y lik kinimam loq echirí' Rire k'o Galilea. Rike kuk' jujun chik uk'iyal ixoqib', xepaqi' lo ruk' pa ri tinamit Jerusalém.

Ri Jesús kamuqik

(Mt. 27:57-61; Lc. 23:50-56; Jn. 19:38-42)

* ^{15:34} Sal. 22:1 † ^{15:38} “Telón”: E jun k'ul kujach upa ri Luwar Santo ruk' ri Luwar lik Santo. Éx. 26:31-33; Heb. 6:19; 9:3-12

§ ^{15:39} “Capitán”: Wa' e aj wach ke cien soldados.

42 B'enaq q'ij, echiri' raj judi'ab' kakiyib'a' pan janipa ri kajawax chike pa ri q'ij re uxlanib'al, **43** ri José aj Arimatea xok chwach ri taqanel Pilato y na xuxi'ij ta k'ana rib' xutz'onoj rucuerpo ri Jesús** cha' kuk'am b'i. (Ri José lik k'o uwach chike ri uchapom wi rib' ri q'atb'al tzij yej lik roye'em ruk'unib'al rutaqanik ri Dios.)

44 Ri Pilato lik xkam ranima' che echiri' xuto kaminaq chi ri Jesús. Ewi xusik'ij ri capitán cha' kutz'onoj che we qatzij. **45** Echiri' xuta chi uchi' ri capitán kaminaq chi ri Jesús, xuya luwar che ri José kuk'am b'i rucuerpo.

46 Ek'u ri José xuloq' jun manta, xuqasaj lo rucuerpo ri Jesús chwa ri cruz y xupis b'i chupa ri manta. Xu'ya'a k'u ri' chupa jun muqub'al k'otom pa'b'aj y xutaq uketeb'axik kan jun nimalaj ab'aj chuchi' re tz'apib'al re. **47** Yey ri María ri aj Magdala y ri María ruchu ri José, xkilo pa xmuq kan wi.

16

Ruk'astajib'al ri Jesús (Mt. 28:1-10; Lc. 24:1-12; Jn. 20:1-10)

1 Echiri' xik'ow ri q'ij re uxlanib'al, ri María ri aj Magdala, ri Salomé y ri María ruchu ri Jacobo, xkiloq' kunab'al lik ki' ruxlab' re kakib'al rucuerpo ri Jesús chupa. **2** Ek'u ri nab'e q'ij re ri semana lik anim k'a e ri' kel lo ri q'ij, xeb'ek pa muqatal wi

** **15:43** Chupa taq rutaqanik ri Dios kub'i'ij we k'o junoq kakamisax chwa che', chirajawaxik kamuqik echiri' k'amaja' kokraq'ab'. Ruma k'u wa', ri José xraj kumuq kan rucuerpo ri Jesús echiri' k'amaja' kajequer ri q'ij re uxlanib'al yej wa' kajequer pa rokib'al aq'ab'. Dt. 21:22-23

ri Jesús. ³ Kakib'i'ij k'u chikiwach: «¿China kesan rab'aj chiqe k'o chuchi' ri muqub'al?» kecha'!

⁴ Pero k'ate xkilo, rab'aj esam chik, yey wa' lik nim. ⁵ Ek'uchiri' xeb'ok b'i chupa ri muqub'al, xkil jun ala tz'ul pa uwikiq'ab' chike, ukojom jun k'ul saq lik naj raqan. Yey rike lik xkixi'ij kib' che.

⁶ Ek'u rire xub'i'ij chike:

—Mixi'ij iwib'. Ri'ix e kitzukuj ri Jesús ri aj Nazaret, ri xkamisax chwa cruz; Rire na jinta chi wara, ma k'astajinaq chub'i. Chiwila wa luwar pa xya'i' wi rucuerpo. ⁷ Ek'u ri'ix jix, ji'b'i'ij chike rutijo'n y che ri Pedro: “Rire ke'ek Galilea, kanab'ej b'i chiwach; chila' k'u ri' ki'wila wi uwach, jela' pacha' ri ub'i'im chi lo chiwe” —xcha'!

⁸ Ek'u rixoqib' xeb'el b'i chuchi' ri muqub'al lik keb'irb'otik ruma b'enaq kina'oj puwi ri xkilo; yey na jinta ne k'ana k'o xkitzijoj wi ruma kixi'im kib'.

*Ri Jesús kuk'ut uwach chwach ri María ri aj Magdala
(Jn. 20:11-18)*

⁹ Ek'uchiri' k'astajinaq chi lo ri Jesús, anim tan che ri nab'e q'ij re ri semana, nab'e xuk'ut uwach chwach ri María ri aj Magdala, ri e resam b'i wuqub' itzel uxlab'ixel che. ¹⁰ Rire xe'ek k'ut cha' ku'tzijoj ruk'astajib'al ri Jesús chike ri xeterej chirij yey xeb'u'riqa k'u ri' lik keb'isonik y keb'oq'ik. ¹¹ Yey rike echiri' xkito k'astajinaq chi lo ri Jesús y xilitaj uwach ruma ri María, na xkikoj taj.

*Ri Jesús kuk'ut uwach chikiwach ka'ib' utijo'n
(Lc. 24:13-35)*

12 Tek'uchiri', ri Jesús xuk'ut uwach chikiwach ka'ib' chike rutijo'n, no'j junwi u'anikil xu'an wa' echiri' rike e ri' keb'inik keb'ek pa juyub'. **13** Ek'u wa ka'ib' xetzelejik, xe'kitzijoj chike ri jujun chik tijo'n; yej wa' na xkoj tane chwikelq'ab'.

*Ri taqanik xuya kan ri Jesús
(Mt. 28:16-20; Lc. 24:36-49; Jn. 20:19-23)*

14 K'isb'al chi k'u re, ri Jesús xuk'ut uwach chikiwach ri junlajuj utijo'n echiri' rike etz'ul chwa mexa, yej xuch'a'b'ej kipa ruma na kub'ul ta kik'u'x ruk' y ruma u'anom lik ko ri kanimá', ma na xkikoj ta ke ri xeb'ilow re ri Jesús k'astajinaq chik. **15** Xub'i'ij k'u chike:

—Jix che ronoje ruwachulew y chitzijoj ri Utzilaj Tzij chike konoje ri tikawex. **16** Ek'u ri kekojow re y kakik'ul ri bautismo, kekolob'etajik. No'j k'u ri na kekojow ta re, kaq'at na tzij pakiwi'. **17** Yey chike ri kekojow re, kilitaj k'utub'al re ruchuq'ab' ri Dios. Pa ri nub'i' keb'ekesaj b'i itzel uxlab'ixel, kech'a't pa jujun chik k'ak' ch'a'tem, **18** kakichap taq ne kumatz pakiq'ab'. Yey we k'o ri xkitijo y na kina'b'em taj kamisab'al ke, na jinta k'o ku'an chike. Kakiya ri kiq'ab' pakiwi taq ri yewa'ib', y wa' kekunutajik —xcha'!

*Ri Jesús katzelej chila' chikaj
(Lc. 24:50-53)*

19 Ek'u ri Qanimajawal echiri' ch'a'tinaq chi kuk', xk'ul pana chila' chikaj y xtz'uyi' puwikelq'ab' ri Dios. **20** E taq k'u rutijo'n xeb'el b'i che utzijoxik ri Utzilaj Tzij pa taq ronoje luwar. Yey ri Qanimajawal xeb'uto'o, xuya chike kakik'ut ruchuq'ab' ri

Marcos 16:20

lxxxv

Marcos 16:20

Dios cha' ruk' wa' kujikib'a' uwach ri Utzilaj Tzij.
Amén.

Ri utzilaj tzij re ri kanimajawal Jesucristo

New Testament in Achi Rabinal; acr (GT:acrN:Achi)

copyright © 2009 Wycliffe Bible Translators, Inc.

Language: Achi

Dialect: Rabinal

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Achi

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-18

**PDF generated using Haiola and XeLaTeX on 11 Nov 2022 from source files
dated 9 Oct 2020**

c47d5e0e-42c2-5f90-9b73-ce40b05f740d